


BIBLIOTEKA

Zakl. Nar. im. Ossolińskich

XVII

1864





E. 24, 209.

# HISTORIA

rerum in Polonia gestarum

ANNO M. DC. XX

recens in Academia Cracouiensi,  
annuatim ad seræ tantum posteritatis memo-  
riam, scribi instituta: nunc tamen permissu  
Superiorum in lucem edita.

AVTHORE

*Et hoc recenter anno Academiæ electo  
Historiographo,*

JOANNE INNOCENTIO PETRICIO  
*Medicinæ & Philosophiæ Doctore, ac pu-  
blico eiusdem in Academia Craco-  
uiensi Professore.*



CRACOVIAE,  
Ex Officina Typographica Francisci Cesarij.

12.286

1622 [?]

IN STEMMA ILLVSTRISSIMI



*O seris narranda nepotibus, & propè ab ipso  
Lucis Presulex, stemmata ducta polo.  
Quantum exinde sibi atque aliis afflastis honorem  
Tantum etiam existinc Historia hæc capiet.*

M. Jacobus Vitellius Coll: Minor.

XVII - 1864 - III

Ill<sup>mo</sup> & Reu<sup>mo</sup> Principi,

D. M A R T I N O

SISKOWSKI EPISCOPO  
CRACOVIENSI, DVCI SEVERIEN.

ACAD: CANCELLARIO, &c.&c.

Domino & Patrono colendissimo.



*N*unquam ego, SENATOR & PRÆ-  
SVL AMPLISSIME, conquirendo-  
rum quæ ubicunq; gentium præclare  
gesta sunt, diligentiam improbaui:  
eorum tamen consuetudinem lauda-  
re haud potui, qui domesticorum incuria, externa  
tantùm suspicientes, virtutem incultu obsolescere si-  
nunt. Etenim sicut non parua boni ciuis commenda-  
tio est, patriam ornare: ita haud minor patriæ pestis,  
despectu suorum, emulationi & gloriæ viam, indoli  
vitam tollere. Animaduerti in tales alibi solitum  
legimus; & merito: Spartam enim quam nactus es,  
vel orna, vel desere. Ideoq; non tantò pere trophæa il-  
la, arcus, corone, statuae, virtutem ubiq; laudatarum  
gentiũ tenebant: quantò pere popularium ore reddi-

ea cuiq; gloria accendebat, ut cum se Brutos, Themis-  
 tocles, Leonidas; Romanos; Athenienses, Sparta-  
 nos audiebant, à moribus sue quisque familie aut po-  
 puli, velut à natura abire nequaquam poterat. Neq;  
 verò nostra tempora, ea operum sterilitas tenet, ut  
 externa suspiciendo, velut in alieno triumpho versari  
 necesse sit. Mitto enim ardens & infixum cuiq; po-  
 pulo fame desiderium. mitto ingentes illos, qui iam  
 annalium paginas compleuerunt viros. videre videor  
 hoc quod descripturus sum prelio, insignes fortissimo-  
 rum bellatorum Duces, primipilos, aliamq; centurio-  
 num & militum cateruam, inter cumulos corporum  
 armorumq;, inter tabem sanguinis, egrè per aduersa  
 vulnera, fessaq; cedibus membra animam trahentes.  
 Quid? num virtutem illorum Manlius, Torquatis,  
 Regulis, Sergiis donas? en Zolkeuius truncate caput  
 adiciens dextere, querit: an eam Sceuole largiris?  
 quin & Konecpolscio, dum ad corpus college dimicat  
 M. Fabium aduocas. Superantne Decii duos Zolke-  
 uios, Korecium, Balabanum, Kasanouium, Ferens-  
 bachium, Dinophium, Wrzescium, Koualkouium,  
 deuotis corporibus in hostes ruentes? Et Lubomirscii  
 Comitis rara illa pro patria liberalitas, nū Q. Fabii  
tantum



## DEDICATORIA.

*tantum virtus est? Cedunt scilicet P. Valerio Duces  
 Zbarauij in planū oppida agentes? Cedūt Corculis,  
 illa prudētia; illa sapientia? Cedit Papyrio Chotheu-  
 cius illo corporis robore, illo animi? Victus fortasse est  
 VLADISLAVS Princeps virtute Scipionis Afri-  
 cani? exhorruit funestam terram! ubi iuueni pari-  
 ter, inter duorum Imperatorum funera, contra for-  
 midolosum toti orbi hostem res gerendæ erant? Et  
 ne singula commemorem, quid Senatus noster? per  
 tot mala & seruitutem orbis sospes, ingentibusq; ini-  
 micitiis superstes, cuinam inuidet imperium vel li-  
 bertatem? Ergo non peccavi, Præsul Illustrissime,  
 dum trophæa hæc domi collecta venerabūdus ad tem-  
 plum Tuum Virtutis & Honoris porto; ubi ad arā  
 vitæ & morum Tuorum, æterna tibi gloria, faustæq;  
 omnium acclamationes adolentur. Non peccavi,  
 inquam, siue illa, siue Te considero. Illa, heroibus tan-  
 tum, excelsæ virtuti, & talibus qualis es Tu propria:  
 Te, ex cuius splendore, sicut aquilæ ex sole, ita egre-  
 griaqueq; indicia sua sumunt. Tacebo enim nunc di-  
 uinis virtutes Tuas, quibus eodem loci, ubi Deum  
 veneramur, inter aras & altaria Sacerdos colluces.  
 Mutam honores Tuos, quibus sublimis in Regno E-*

## EPISTOLA

piscopus, & inter Episcopos Senator rarias. à Deo  
 ista Tibi destinata erant, neque illis qui fastigia hæc  
 conferre poterant, eligendi Tui potestas, sed gloria  
 relicta fuit; Tu hæc debita virtutibus Tuis nascen-  
 do statim meruisti. Transibo quantacunq; illa sint;  
 Clerum ad antiquum virtutis habitum, id est, ad si-  
 militudinem Tui reformare. adducere in Episcopam,  
 dilectam Tuam Spartam, quicquid usquam egregii:  
 tot institutiones, tot supplicationes, tot grates, toi  
 preces, tot templis donaria: videlicet ut omnes disce-  
 rent, Deum pariter ea pietate, qua Tu colere. Non  
 commemorabo Hierosolymitanas illas diuitias, neque  
 in secunda religionum Italia, alibi quam Rome &  
 Bononiæ collocatas: à Te velut septem mundi ni-  
 racula, ad septem ecclesias Cracouiam deducias.  
 Ipsa templa tam raris ab illa celesti Christi, in  
 terris vicaria sede Apostolica, muneribus cumuata;  
 quantum religionis per Te acceperint, augustinere in  
 dies vultu & celebritate testantur. Sed in Episcopa-  
 tu quicquid Tui muneris erat fecisti, in quo nonne  
 interfuit patriæ ut Episcopum Te haberet? vide  
 quantum adhuc intersit, Episcopum Te tantum ha-  
 beat, an etiam Senatorem. Non hoc dicam, quam  
Tu pol-

## DEDICATORIA.

*Tu polleas prudentia, consilio, auctoritate: quàm sis magnus in literis: quàm ardens in opere, firmus pro veritate, offensionum pro utilitate publica impavidus; omnes enim ista norunt quicumque Te norunt. Illud unum quomodo dicam? cùm VLADISLAVS Princeps contra immanem barbarorum vim, fata omnium nostrum in acie versaret; cùm SIGISMUNDO Regi eodem tendenti, ubique conclamaretur ad arma, hominibusq; urbes, villes, vici, agri nudarentur. Quid? sensisses te Cracovia principem Poloniae urbem & arcem insignium Regionum, illiusq; Coronae, quam tibi commissam, capiti Regio servare debuisti? cùm Georgius Dux in Zbaras, Castellanus tuus, cum cohortibus & copiis suis, cum Rege adversus hostes processisset? cùm Ioannes Comes in Tęcyn Palatinus tuus, uniuersum nobilium robur, sub signa & vexilla euocasset? cùm Gabriel Comes à Tarnow Capitaneus tuus; cùm omnis equestris ordinis flos, viri, iuventus, velut vno agmine Regem secuti te desererent? Habuit Te solum SISCOVI Cracovia, qui dignitatis & salutis sue curam, sumptu & opibus Tuis contracto milite, libens susciperes, atq; ad sana deum, aras, focosq; eius, paludatus Pontifex*

EPISTOLA DEDICATORIA.

*rifex excubares. Frem nunc inter signa & cohortes  
Tuas, inter vota & acclamationes, quibus Te nu-  
meroso stipatum milite, totus excipiebat populus: nisi  
plausus ille hominum & Tua gloria, publico conse-  
crata elogio, latè iam per omnem memoriam incul-  
cata iret, ceteris incitamento, ut quicumque post Te  
futuri sint, Tui similes sint, Tuoque exemplo, in sena-  
toria libertate Æmilianum, in seruanda urbe Ca-  
millum, in suscipiendo discrimine Fabium imitentur.  
Ego quoque PRÆSVL ILLUSTRIS-  
SIME, in hoc operis mei introitu, imitatus illos, qui magnas  
urbes intrantes, primùm sacras edes, & dicata Nu-  
mini summo delubra adeunt; ad Te velut Vestalem  
ignem, perpetuo in templo Dei accensum venio, Pa-  
tere ô Antistes, primam hanc meam feturam, noui-  
tio partu elucubratam magnitudini Tue sacrare.  
Patere hoc laboris mei rudimentum à fauoris Tui  
nutrimentis incrementum sumere. Sic enim & mi-  
hi, aduersus maligni liuoris incursus, robur: & quod  
aliis præstare solet, Historiæ meæ à Te veniet FAMA  
& ÆTERNITAS.*

*Illustriss: Cels. Tue*

*deuotus obsequijs*

Ioannes Innocentius Petricius<sup>2</sup> Me-  
dicinæ & Philosophiæ Doctor.



# HISTORIA

rerum in Polonia gestarum  
Anno M. DC. XX.



RES factaq; Polonorum, ab anno  
suprà Millesimum Sexcentesi-  
mum, vigesimo, scribere aggre-  
dior, prosperiore hâc in parte ve-  
terum materia & conatu, cum  
per mille circiter annos retrò,  
crescentes opes, fortunamq; populi memorarent  
pari eloquentiâ & libertate. Mihi in arcto &  
anxius labor, dum graue annis Regnum, incerto  
æuo vitaque, & in ipso exordio annum cruen-  
tum accipio. Sed iram hanc Numinis, afflictis  
eodem tempore alijs grauiore discrimine regnis,  
in nos quoque referre liceat, meliore futurorum  
voto augurioque nostro, & fasce ac sceptro  
SIGISMUNDI III. Regis, quod felix hæc-  
tenus Regnum, firmumque robur imperij præstat.  
Eius ductu prosperitateq; Hieremias & Simeon  
Principes Valachorum, oblato ipsi vectigali in-  
tutelam accepti. exutus Rosuana Transyluano-  
rum Dux exercitu, paloque suffixus. Liuania ar-

*Intentio au-  
thoris.*

*Res geste Si-  
gismundi Re-  
gis.*

## Historia Rerum

mis vindicata. Aditæ & fractæ, longinquitate secreta, ac penè incognitæ gentes. Smolenscum ciuitas, a Moscis vltra centum annos, non bello, sed proditione nostris erepta, ædificiis aucta, & validissimo ingentis arcis præsidio munita: obfisione bienni, ab ipso vastata, & in potestatem redacta. Tota Moschouia infestis armis perlustrata, & captus Imperator Basilius Suiscius, cum Ioanne & Demetrio fratribus, ante eius solium procubuit. Prussia pleno iure in imperium & ditionem nostrorum celsit. Seueria & Cerni-  
 uia Moschorum prouinciæ, à VLADISLAO Filio, paterno iussu exemploq; subiugata. Quin eiusdem Regis auspicio & fortunâ vastata a Kosfacis Turcarum Achilles, Techinia, Kozlouia, Otsakouia, Belgradum, Theodosia, Trapezuntium. & super alia insignium suarum vrbium excidia, Synopis quoq; caput & regia Ponti, dum tempus mercatus ditem alioquin vrbem, maiorum opum specie compleuerat, graui ruina concidit. mox Præcopum expugnatum. Sed & mare tentatum; in quo Cicalæ Bassæ filius, victus & occisus: alter item Bassa, classe victa captus & in vinculis mortuus. territa Constantinopolis subitis armis, suburbiorum incendiis, incussa que sæpiùs Turcis Polonorum reuerentia. Et quòd solum voce publicâ dixisse habeo, nil aduersum,  
 etiam

*Vladislai filij  
 prima mili-  
 tia.*

*Kosacorum  
 aduersum  
 Turcas egre-  
 gia facinora.*

etiam iratis fatis, plus fortunam in nos potuisse, quàm domesticam discordiam.

Cæterùm vt negotij mei initium, ordinem, finem curatiùs differam; consilium mihi est ante pauca de Valachia, deinde Gratiano, causisque belli præmittere.

**V** Alachia in duas nunc partes diuisa est. vtraq; à meridie Danubium, ab occidente Transyluaniam contingit. quâ versâ in Septentrionem ad Tyram fluuium, nostrarumq; terrarum confinia vergit, Moldauia dicitur. Fluuius Moldaua, modicus licet, ibidemque Sossauæ aquis emoriens, tamen in nomen terræ eualuit, maiorq; pars eius Moldauia nominatur, nisi quâ montes ab oriente procurrentes, vltrâ nomen hoc submouent, veterique appellatione ibi tantùm Valachia manet, quæ etiam nunc Transalpina vocatur. Nostris contrâ, propior pars Valachia, altera Moldauia dicitur. Cæterùm tota hæc regio, antea libera, primùm Daciæ, deinde Valachiæ nomen tenuit: internis postea dissidiis, plures dominos, mox appellationes, tandem seruitutem accepit. Defuncto enim Stephano, primo post Bazardum Principe, inter ambiguos qui nam in imperium deligeretur, inclinari res Valachorum cœptæ. Neque externus dominationi quærebatur,

*Valachia descriptio.*

*Verus appellatio & liberias.*

*Initium & causa mutationis eiusdē discordia.*

*Stephanus  
tributariam  
promittit Ca-  
simito Magno  
Anno 1359.*

*Et Valachi se  
sponte tutela  
Polonorum tra-  
dunt Anno  
1376.*

*Rursus in fa-  
ctiones diuisi*

integrâ etiamnum Stephani domo, & superstiti-  
bus duobus filiis Stephano & Petro. Sed quia po-  
pularium fauor ad Petrum inclinabat, qui alio-  
quin audacia promptus, proxima quæque corri-  
piendo, apud turbidos potior habebatur: pro  
Stephano, ius principum, mos patrius, & natura,  
vt natu maior succederet stabat. præualuit ta-  
men Petrus. Stephanus, quòd vnum subsidium  
credebat, ad preces versus, vectigalem totam Va-  
lachiam promittens, à Casimiro Magno Rege  
Poloniæ, perduci se ad patrium fastigium orat.  
Sed quamuis copiis eius reffectus, ad gentile de-  
cus euaserat; diu tamen per aduersâ conflictaba-  
tur. Nam Petrum ingenio violentum, super so-  
litam fratribus inuidiam, amissi quoq; principa-  
tus pœnitentia, & secuta postea mors Casimiri,  
acrius in Stephanum agebat. Quâ occasione  
motæ aut accitæ Turcarum gentes, Bulgariam,  
Seruiam, & quicquid à tergo erat occuparunt:  
adeò proximo periculo exterritis Valachis; vt  
spontè oblato perpetuo vectigali, iterum tutelæ  
se & patrocinio nostrorum darent. Multùm id  
ipsis ad animos & gloriam profuit. Nam neq; à  
nostris tributorum magnitudine attriti, & Tur-  
carum bellis celebres, alienâ fiducia, strenuè re-  
tinebant libertatem & virtutem. Discordes  
deinde, & domesticis factionibus fessi, dum do-

mina-



*in Polonia gestarum.*

minationi implicantur; adducti sunt vt feruissent. Manebat quippe vetus adhuc inter succedentes de principatu dissensio: cui sæpius popularium fauor occasionem, & socios aut ministros turbarum dabat. Hinc armorum initium, & è propinquo pars fortunæ Turcis. Nam dum illi per acies occupantur: hi in adnexa & vicina irrumpere, castella, vrbes corripere: haud multum etiam repugnantibus Valachis, tædio præsentium, & vbi successu destituebantur, propensione etiam in hostes. Sed Turcæ satis iam eorum opibus aucti, vsurpandi iuris gratia, & quia ad omnes euentus utilius id videbatur: partem Valachia quam nos Moldauiam vocamus, imposito nouo Principe distinguunt. in aliam quoque animis viribusque intenti: sed quæ etsi non perpetuo constans, neq; omnino aduersa; potentiam tamen nostrorum diu prætulit. Postquam verò Mahometi Secundo, Constantinopolis, & quicquid supererat Græciæ cecidit, tunc demum & ipsa ad Turcas conuersa. Creuit ex eo acris contentio. Nam & Poloni, veteri iure Valachiam sibi asserebant, & Valachi innatâ mobilitate, arma nostrorum in Turcas prouocabant. Atq; sub regno nostro hucusq; Valachia esset, ni ipsi hos illosq; prout inualuerant, vel pro libitu fouere assueti, tædij remedium, flagitiosâ apud vtrosq; perfidiâ quæssissent. Ad ex-

*Occasionem  
Turcis occu-  
pandæ Vala-  
chia Transat-  
pinæ.*

*Nec multo  
post vsurpan-  
dæ dederunt.*

*Alterâ Vala-  
chia non o-  
mnino con-  
stans.*

*Vsq; ad Ma-  
chometem il-  
Polonorum  
amicitiam  
prætulit.*

*Inde neutri-  
fida.*

*Et à Polonis  
ob frequen-  
quentem per-  
fidiam relicta*

*Turcarum im-  
perio concessit.*

*Turcarum in  
dandis Prin-  
cipibus mos.*

*Valachis Ga-  
sparus Gratia-  
nus prepositus*

tremum, quia nostris pretium bellorum & sanguinis, non nisi eorum perfidia erat; segnius exinde publicis opibus adiuuabantur. Nobilium multi, ius Regni priuatis viribus sæpè vindicarunt: si perinde postea firma fuisset genti fides; quam nostris ex eius compressione tantum gloria. Ita publica quies, Turcis in occasionem vsurpandæ Valachiæ cecidit. Mox sublata etiam libertate impositi Principes, non ex nobilissimis popularium, aut gente Turcicâ, sed vndecunq; oblatis viles, obærat, quandoq; pudendâ origine vel seruitio. Neque id genus despectum apud Turcas, vltroque tales honoribus appetuntur; quia ex vilissimis minùs periculi: multi vt degeneris animi notam interpretantur. Sed maximè Christianis qui in ritus eorum transgrediuntur, ad alta aditus. His prouinciæ, decora militiæ, curæque imperij decernuntur, Turcis non regimen non dignitas patet, maius pretium est alibi nasci, & in Christum per iurum esse. Valachis tamen velut solatio Princeps Christianus imponebatur. & hoc tempore, Gasparus Gratianus præerat. de cuius origine, fortunâ, & quia nostri belli pars magna fuit, paucis quoque expediam.

Germanus is erat (quamuis aliam ferri, de natalibus eius famam haud sum ignarus) Græcij

in Styria natus. Causa illi mutandæ terræ, domestica paupertas, & frater natu grandior fuit. Nam is coëmendarum gemmarum gratiâ Constantinopolim profectus, vbi negotiatio prouenerat, sede quoque ibidem firmatâ, Gratianum admodum iuuenem eò transtulit. Illic in ministerio fratris adultus: mox mutando merces, terras & principes obibat. Auctæ hoc modo opes, & hæc ipsa diuagatio, breui ad non suæ spei & originis nomen inopinum extulerunt. Quippe delatus in Italiam, cum venundatis Principi Hertruriæ pretiosorum lapillorum mercibus, reditum Constantinopolim pararet; nouo quæstui redimendorum Turcarum, qui tunc captiui Liburni habebantur, animum adiecit. Delectu ergò ex nomine & conditione facto, ad octoginta circiter naui imponit, ac Constantinopolim reuehit. Vbi eò appulit, & hæc Turcis nuntiata sunt; confestim omnes accurrere: complere portus & littora: alius liberos, parentes, fratres, propinquos, sciscitari aut noſcitare: alius illuuiem & squalorem reuecti coetus mirari: quisq; vt erat nouitate rei percitus in obuium, ille in plures cumulata admiratione spargere: velut insolita Christiani ea propensio in Turcas, & non lucri studium fuisset. Mox diffusus totâ ciuitate rumor, amplissimum homini præmium tulit.

*A fratre Constantinopolim traductus.*

*Negotiatione pretiosorum lapillorum sustentabatur.*

*Inde in Italiã delatus.*

*Turcas captiuos redimit.*

*Constantinopolim reuehit. Hinc Turcarum admiratione.*

Accer-

*Et Cæsaris fa-  
uore.*

*Ducatum  
Naxiæ & Byf-  
sancensem  
adeptus.*

*Tandem Va-  
lachia prepo-  
nitur,*

*Sed Gratia-  
nus ambiguus  
dominandi.*

*Opes tantùm  
parabat.*

*Deinde susse-  
pta Turca-  
rum & Vala-  
chorum fide.*

Accersitum enim Achomates Cæsar, quod fi-  
dum sibi putaret virum, Ducatu Naxiæ & Biffa-  
censi excipit. Postea imperatâ legatione, ad  
Mathiam Christianorum Imperatorem, quia ex  
voto perfecerat, redeuntem Valachia auxit. &  
accepere Valachi lati vt fermè ad noua imperia.

At Gratianus sublimis licet potentia; sæpè  
tamen pristinam conditionem, inter insperatas  
felicitates recognoscens, suspectas fortunæ blan-  
ditias, & Turcarum beneuolentiam habebat.  
ideoque dominandi ambiguus, palàm prouin-  
ciam, clam verò ingentes opes curabat. Proui-  
derat nempe Turcarum breues & infaustos fa-  
uores; amicitiam aliquandiu prosperam, nun-  
quam securam; Valachorum vt leuia ita infida  
ingenia, potentiam inuidiæ odioque ambien-  
tium obnoxiam. Nec defuit suspitioni cre-  
dulitas, dum multi Turcarum, velut in satelli-  
tium illi additi, nuntios, introitus, aperta, se-  
creta, scrutarentur. Quapropter perinde Tur-  
carum fauori, quàm fidei Valachorum diffisus;  
diu meditata consilia, in alterutram calliditatem  
intendebat; vt aut opes, quas tradita prouincia  
pepererat, aliò transferret: aut Valachia Tur-  
carum potestati deducta, firmiorem potentiam  
per rebellionem faceret. Cupiditate partæ do-  
minationis, ad retinendam prouinciam flexit:

*in Polonia gestarum.*

9

ac si præsentia minùs prouenissent; faciliori potestea curâ opibus: quàm dignitati consuleret. Igitur quod præcipuum videbatur, vt Turcarum potentia aliam opponeret, in partes nostrorum transgredi parat. Hoc enim pacto, & faciliores Valachorum animos, si in veteres dominos adduceret putabat, & oblatum restituendæ prouinciæ obsequium, exasperataque inuicem Turcarum & nostrorum odia, prompta & prospera quæque illi apud nos pollicebantur.

*Turcorum rebellionem potentiam sperans.*

*Valachiam Polonis tradere meditantur.*

Sed quia bellum, omnium quæ cum Turca gesta sunt, maximè memorabile dicturi sumus; res quoque admonet, vt primordia causasque eius altius orsi aperiamus.

*Digressio ad causas belli.*

Quamuis enim publicè à nostris negligebatur Valachia; varios tamen motus, à Turcis possessa, apud populum, apud legiones, apud primores ciebat, etiam quibus negligenda videbatur, tamen indignabantur inter prouincias Turcarum, Valachiam tot annis à nostris habitam numerari darique. Vbi illam gloriam Tarnouiorum, Seniauiorum, Lasciorum, Wisneuciorum, Zamosciorum, impositos arbitrio Turcico, hostiumque artibus infectos principes exturbantium? Neque deinceps fortium virorum animi teneri poterant, vtpote qui libertatem & æmulationem amabant, coër-

*Valachiam à Turcis possideri egre Poloni patiebantur.*

*Aliquorum illic egregia facinora.*

*Dux Korecius  
priuata arma  
in Valachiam  
infert.  
Prospera diu  
fortuna.*

*Demum in-  
saufocuentu*

*Qua victoria  
sublati Turcae.*

*Bellum regno  
Polonia infer-  
re meditatur.*

ditionem vt speciem feruitutis oderant. Quin-  
non multò post Dux Korecius, vsurpato exem-  
plò, ope priuata, infestos in Valachiam exer-  
citus inferebat, graui rabie & dolore Achoma-  
tis Caesaris. Magnis enim praelijs sæpè & fæli-  
citer congressus, exercitus eius clade ingenti  
excipiebat delebatque. Nec dubium habe-  
batur, si à nostris adiutus fuisset, & resumi Va-  
lachiam, & ipsum non capi potuisse. quod con-  
trà factum, spem quoque & audaciam Turcis  
in nos præbuit, cum fatali ipsius casu, velut illa  
cunctos complexi victoria, animum etiam po-  
tiundi nostri assumerent. Inuitabat quippe,  
inter alia, Regnum accessu facile, nullis mon-  
tibus clausum; gens laborum tolerans, multæ  
solertiæ, bello strenua, ac si discordia, cæteraque  
libertatis vitia abessent, prorsus inuicta. Ver-  
fabatur & ante oculos, terra immensis diffusa  
spatiis, in eaque copia sulphuris, nitri, plumbi,  
æris, ferri, argenti, nerui & instrumenta bello-  
rum; vbertas frumenti, numerus equorum pe-  
corumque ac omnium vtenfilium, haud minus  
magnifica, quàm opulentis etiam terris reperiri  
suenta. Inuitabat denique auidos religio, quâ vo-  
tuo obligatoque excindendorum Christiano-  
rum odio imbui dicuntur; & insana persuasio, ali-  
quando fore, vt soli totius orbis potiantur:

tum

tum verò illa fortuna, velut signo & omine, à Diis ad proferendum imperium accepto, in nos intenti. Cæterùm quia restincto priuati vnus bello, causa illis in publicum minùs suppetebat, ad antiqua reuoluti, Kosacorum incursiones obtendebant.

*Sed quia in  
sta causa decer-  
at.*

*Kosacoru in-  
cursiones ob-  
tendunt.*

Duo horum summa nomina. Donensium & Zaporouiensium, Lissouienses enim falsò ad Kosacos ab aliquibus transferuntur, quamuis leuitate armorum pernicitateque in bellis ipsis similes agunt. Quippe legionarij sunt nostri milites, morem tantùm belligerandi, duce Lissouio, bello Moschouitico secuti, eundem nulla prorsus sede, cum authoris adhuc nomine tenent. Rectiùs tamen hos Velites, alios Kosacos dixeris. Donensibus, Don fluuius Latinè Tanais, sedem & causam cognominis dedit. Zaporouiensium idem situs & origo, qua Borystheni propè finis est. Vasta illic omnia, continuisque ac velut sine fine campis deserta regio. vulgus agrestium, ex circumiectis Kiouix locis collectum, illuc transgressi, in nomen Kosacorum coaluit. Neque verò illud arandæ exercendæ terre, alioquin fertilis studium eò induxit; sed prædarum ex hoste dulcedo, & vt quæcunque circum iacent, vasta tamen & deserta essent. Tartari enim per solitudines vagari soliti, con-

*Kosacorum  
genem.*

*Lissouienses.*

*Donenses.*

*Zaporouien-  
ses.*

*Zaporouien-  
sium sedes.*

*Cum Tartaris  
prælia.*

iuges iam cum liberis armentisque illuc velut in neglecta promouebant. Hinc Kosfacis materia raptus & gloriæ; iamque ad proximos iam longius clarescendo, velut aperta terra & licentia, ingens ad eos concursus, non multitudinis modo; sed nobilium etiam, quos exercendæ rei militaris studium eodem transferebat: aliorum, quos necessitas aut scelus patriam exigebat. Neque illuc venientes, vrbes aut tecta receptabant; sed vacuas solitudines æstate pererrando, hyeme rursùm domos quisque suas, aut adiectos Kiouix vicos repetebat. Step-

*Ciuitas Terehtimirouia*

hanus Battorius Rex Poloniæ, donata ipsis ciuitate Terehtimirouia, quinquaginta eos millibus passuum, a Kiouia seiunxit. Ipsi deinde

*Insulas Borysthenis occupant.*

sponte in vltiora promoti, cum vndique Tartaros submouissent, Borysthenis insulas occuparunt. Id subsidium illis aduersùm fortuita, & occasio asuescendi ad officia naualium erat.

*Inter insulas Tomakovka.*

Præcipua insularum Tomakovka, in qua genti radix est; nam alias, quamuis amaniore sæpè tamen deseruerunt. illic medio anni positus tantùm mapalibus habitant; pauci ob loci angustiam, sed incultu vrbium horridi, & quia

*illic positis mapalibus habitant.*

*Ceteri per oppida disperguntur.*

periculis sepositi, cæteris ferociore. multitudine alia, quæ in dies crescit, latè per nostra oppida dispergitur. vbi quid subitum, aut in hostes excurrere illis consultum, data tessera eod-



dem confluit. Otio iterum suas quisque sedes  
repetit. fortissimi & bellicosissimi Tomakovv-  
kam regrediuntur. placet talibus locus, vbi  
Turcarum Tartarorumque imperijs adiecti,  
promptius clarescunt: ipso etiam periculoso  
aditu, velut à similitudine & inertia aliorum  
amoti. Nam Borysthenes, quamuis diu præ-  
ceps sæuisque decurrit, tamen obuius ipsorum  
insulæ, quæ inter aspera rupium hinc atq; illinc  
presso eundum est, ingenti fragore ex alto de-  
cidit, & continenter montibus aliquot deie-  
ctus, aquisque semper è sublimi pendentibus,  
feruens adhuc & sonans, derelicto ad dextram  
alvei Corcica oppido, virtute quondam & sede  
Visneuecij celebri, mox Tomakovvæ insulæ  
aduoluitur; nomenque deruptorum & præci-  
pitiûm, quæ euaserat ad Kosacos transfert.  
Illa enim Latine Cataractæ, nostris à similitu-  
dine liminum, vt quæ nouem, velut gradus,  
per ordinem posita videas Porohi dicun-  
tur. Hinc quod ultra est, zá porohi,  
vnde & Kosaci Zaporouientes denominantur.  
Mutant tamen subinde id nomen & Nisouien-  
ses, sed ex re vocantur. Nam terra apparens  
illic depressior, ex decliui fluminis decursu Nis  
dicitur; quamuis non emiserim, ob eandem  
causam Voliniam vteriore, per quam Ko-  
saci diffunduntur, Nis quoque à plerisque vocari.

*Borysthenis  
Cataractæ.*

*Porohi.*

*Zaporouien-  
ses aliquando  
Nisouientes  
vocantur.*

*Volinia vte-  
rior Nis dicitur.*

Hæc

B 3



*Kofacorum  
disciplina.*

*Excursiones  
in Pontum.*

*Recurfus ad  
causas belli.*

*Turca Polonis  
graues.*

*Tartaros im-  
mittebant.*

Hæc de origine & sedibus Kofacorum celeberrima. Cæterum quod in turba mirere, multum iam inter eos, disciplinae & solertiae videas: per vexilla & turmas componi, præponere fortissimos, audire præfectos, nosse ordines, intelligere occasiones, suas leges, suos magistratus habere. Ad id tamen adduci non possunt, ut agros colant, solum conferant, sepiant, rigent. quicquid prælio partum, & sua cuique manus necessitatibus subuenit. Iners quippe videtur cum terra in annum contendere, quod alicunde possis citò sanguine parere. Quapropter crebrae illis in Pontum excursiones, ob faciles appulsus aliaque ad irrumpendum opportuna. nam Borysthenes ab insula quam colunt, vix centum millibus passuum amotus, illic affunditur marique miscetur. Sed Kofaci paruo Turcarum damno, diu mari se tenebant; donec continuis eorum apud nos exostulationibus, & nostrorum metu irritati, quantò magis exitio deposcebantur; tantò acrius in aperta quoque & vrbes eorum effunderentur. Et Turcæ siue ad tollendos Kofacos, promptius nos iniuria impulsuri; siue lacerando prouincias validius pro tempore bellum seruaturi, Tartaros quoque immittebant, eorumque turmis immixti, non furtim ut antè, sed palàm populabantur Russiam. Hinc nostrorum

*in Polonia gestarum.*

frorum questus, mox ira, & vt aliquibus videbatur, remedium non nisi ex bello. sed non temere illud mouendum, & omnia, iure prius secundum pacta Sigismundi Primi experienda, ea sententia vincebat. Ergo mittebantur nuntij, foedus & amicitiam memoraturi. irrito tamen conatu: cum verbis benigna referrentur; re autem vetera continuarentur. Iamque in arma nostri inclinabant; ni Turcæ diluendis prolatandisque damnis callidi, vt super contro- uersias incursionum à Kosacis illatarum recuperatores decernerentur nostros rogando, multos spe quietis attinuissent.

*Polonos de iniurijs expostulantes.*

*Excusationibus aut dilationibus ducebant.*

Profecti igitur, è nostris, generalis exercituum imperator Stanislaus Zolkeuius: è parte Turcarum Skinder-Bassa, (id erat Dalmatæ nomen, & honor perfidiæ) iusta vterque manu ad Bussam conuenerunt. Ibi Turcæ audaciam Kosacorum conqueri, vetera nouaque damna adducere: simul percensere numerum oppidorum, quæ quamuis essent nostra, tamen vt Kosacorum receptacula dirui volebant. Aduersum quæ Poloni obstinati, cum resoluere hoc facto vim imperij, totque oppida alieno arbitrio donum dare abnuerent; mox proferruntur à Skinder-Bassa sui Imperatoris literæ, quibus ni Bersada oppidum cis Axiacen, vulgò par-

*Recuperatoriis cū Turcis conuenius ad Bussam vulgò Comissis.*

*Illic Turcæ multa oppida vt diruerentur postulant. Sed Polonis abnuentibus.*

*Ad vnum oppidum nomine Bersadam*

par-

*controversia  
deuoluitur.*

*Idē propter  
Basiliū Bosy  
clarū  
Turcarum &  
Tartarorum  
victorijs.*

*Poloni quie-  
tem bello præ-  
ponentes ad  
id damnum  
inclinant.*

*Sed quia op-  
pidum Ducū  
in Zbaras e-  
rat.*

*Ambigui re-  
sponsionis ad  
Georgiū Du-  
cem mittunt.*

paruum Borysthenem situm tolleretur; abire incæpto iuebantur. Ergo in id vnum omis-  
sis alijs Turcæ incumbunt. nec quia tutos se in  
posterum hoc damno sperarent; sed infensi op-  
pido præfecti claritudine, & proprio dedecore.  
Nam Basilius Bosy, strenuus militiæ, acribusq;  
in ea ministerijs præfecturam Bersadæ adeptus,  
crebris illinc aduersum Turcas & Tartaros excur-  
sionibus oppidanos assuefecerat; nec multò antè,  
cognatum Præsidis superstitionum Turcicarum  
comprehensum, in vinculis tenuerat. Nostri in  
ancipiti periculosam facilitatem, infectam pa-  
cem, siue omnia, siue nihil Turcis concederent  
reputantes; tamen velut tutius per detrimen-  
tum, quàm per bellum pax conficeretur; in op-  
pidi vnus iacturam haud grauatè consentie-  
bant. Sed vnus metus omnes tenebat, ne  
aliena largirentur, Ducesq; in Zbaras, quorum  
id oppidum erat, ne sese opponerent vereban-  
tur. Postremò à Zolkeuio imperatore, vni ex  
primoribus negotium datum, qui Georgio  
Duci in Zbaras Incisori tunc Regni, postula-  
tionem Turcarum referret. Nam neque vlli  
ius in priuata cuiusquam bona erat: & oppor-  
tunè tum Georgius cum tribus millibus mili-  
tum suorum in castris aderat. Haud dubium  
statim Duci videbatur, hâc conditione tentari

patien-

patientiam nostram, & ex vno aliud peti. sed  
aitæ magnanimitatis memor, & quicquid pu-  
blicè salutare non esset; priuatim non suum exi-  
stimans. Ne dii siuerint, respondit, vt per me ve-  
stra & Reipublicæ pax distineatur. deferam mox  
in planum Bersadam. patria illic causa & cura va-  
cabit. Inter hæc citatim præmissus Piascouius, ac  
intra viginti quatuor horas, quinquaginta millia  
passuum emensus, Bersadam aduolat: oppidanos  
persuasione aduentantis hostis territos, vt in tu-  
tiora sese recipiant permouet: ac raptim quibus  
quisque poterat elatis, noctu vt iussum erat, per  
idoneos & secreti conscios, ab aliquot locis, oppi-  
do faces injici iubet. Tum vbi publica priuataque  
in igne confedissee certum fuit; subditus Tur-  
cisque relatus rumor, quo fortuitum oppidi in-  
cendium adsimulabatur. Quare missi à Skinder-  
Bassa exploratores, cum ex ignis violentiâ, cineres  
tantum & vacuum campum remansisse nuntias-  
sent; tandem velut fortuitus euentus controuer-  
siam sustulisset, de pace tractari ceptum. Cæterum  
populo ex oppido illo exturbato & profugo, ali-  
locus à Ducibus in Zbaras datus, in quo subitis æ-  
dificijs exstructis, deducta noua colonia, quæ ab  
eius loci fluuio Bobroua etiamnum dicitur. Ita v-  
nius Ducis, priuati dispendij contemptoris libera-  
litate, nec malè inopi multitudini, & egregiè om-

*Eius magna-  
nima respon-  
sio & destina-  
tio.*

*Præmittit  
Piascouium.*

*Vt oppidum  
manu sua ex-  
urat.*

*Turca cre-  
dunt fortuitò  
haustum.*

*De pace vltè-  
rius tractant.*

*Bobroua no-  
ua colonia po-  
pulo exturba-  
to deducitur.*

niūm voluntati cōsultum. qui magnus animo, nec minor hoc facto, quā ex victoria triumpho, æternum magnanimitatis suę exemplar dedit. quippe seipsum vicit; nec modò patrię oppidum, sed & hosti affectum donauit. ne respectu quidē potentiaę suę motus, in se potiū, quos in hostē portauerat, effudit spiritus. Sed faciliū adhuc à Turcis disimulabatur bellū, quā odium. Sub idem enim tempus, aliam arcem oppidumque nomine Raskovv, Ducum in Ostrog, ad Tyram situm, subita Tartarorum violentia vastarunt: vana apud nos excusatione; cum insolentem semper Scytharum gentem, etiam si summā feueritate regatur, in rapinas corruptam dicerent. Neq; adhuc duorū non ignobilium armis bellicoque apparatu oppidorum excidio contenti, Kosacorum tamen iniurias, vt armis persequeremur instabant; callido & doloso cōsilio, quos si nostri asperassent; illi promissis à Cæsare premijs libertateq; ad defectionē deinde in nos vertere, occultis literis, vt postea innotuit conabantur. Sed Zolkeuius quantum è Republica peteretur haud ignarus, corripuisse tantum & ostendisse arma satis ratus, vltra nō institit.

Ex eo auctæ Kosacis in Turcas iræ, quas præterquam castigatio imperatoris, & vulgata de excidio suo fama, fides etiam propè visi exercitus accendebat. Inde non portus modò & proxima ma-

*Eodem tempore Tartari Raskovv oppidum Ducum in Ostrog vastant.*

*Vanè, excusant tamen.*

*Petunt vt Kosaci armis premanantur.*

*Nimium doloso consilio.*

*Quo Kosaci exacerbati, Turcarū provincias acrima infestant.*

ris, sed interiora vrbesque Turcarum penetrare, premere, excindere: cuncta incendijs, cæde, sanguine complere. quin non multò post suggesti Constantinopolim, Cæsarem venationi intentum trepidumque, fuga intra mania compulerunt, accensis circum vicis suburbiiisque. quæ omnia tunc forte præfenti, ac velut per ludibrium, super firmam fœdera missò nostrorum legato, à Turcis è propugnaculis monstrabantur. Ita flagrantior quoque Tartarorum vis. Hic florentissimum Ruffiæ latus, infestis armis tenebatur, vrebatur: illic opulentæ Turcarum prouinciæ & vrbes excisæ soloque æquata, à Kosacis nostris iniuriis rependebantur.

Atque cum vetera vtrinque redirent; iterum Zolkeuius postulatus à Turcis arbiter controuersiarum, insigni non militum modò, sed etiam procerum manu, ad Orinimum haud procul Cameneco, statiuam agebat. vbi cum à Tartaris insolenti accursu turbaretur; repulisse propius suggestos contentus, eodem quo antea consiliorum tenore, vt pacem seruaret aut haberet, graui edicto, nè quis abeuntes insequeretur, omnes tenuit. Hinc in eum odia, & multorum suspicio, tanquam corrumpere victoriam; ipso etiam hoste, quoties Ruffiam popularetur, (bonis eius, nota arte, intactis relictis) suspicione eum maiori onerante. qua ille pressus, antea nec ausus, nec vt in tempore memorabo,

*Ante vrbes  
Constantino-  
lis incendunt.*

P

*Tartari Ruffiam  
sepius  
populantur.*

*Alter recuperatorius con-  
uentus ad Orinimum.*

*Tartarorum  
inoleranda  
insolentia.*

*Zolkeuius  
iras Polonorum  
moderatur.*

*Astus hostium*

*Rebellium le-  
gati Osm inū  
Cæsarem ad-  
uersus Polo-  
nos impellunt.*

*Et ipse apertè  
sedus violat.*

*Regressus ad  
Gratianum.*

*Gratianus pu-  
blicolam in-  
duit.*

ad vltimum satis cunctatus erat. Interea per Bo-  
hemiam, Vngariam, & iuxta sitas Prouincias, in  
suum dominum feruebant bella: commoda Tur-  
cis occasione, velut citius, dum alij occuparentur,  
cum nostris patrari bellum posset. Et rebellium  
quoq; legati Constantinopoli tunc degentes, pro-  
pria causa Osmanum Cæsarem stimulabant; haud  
perinde formidoloso sibi futuro Ferdinando, si  
nostri per acies distinerentur. Ita intentã iam diu  
in bellum Cæsaris curam, insuper in iniuriam per-  
pulerunt, vt is repulso ab vrbe cum Regiis literis  
Otfinouio, ius etiam hostium, sacra legationis, &  
fas gentium temerarit.

Hic rerum nostrarum status cum Turcis erat,  
qui Gratiano (ad quem redeo) spem vt nouandis  
rebus anxiam, ita audenti paratam monstrabat.  
Sed ne intentatis popularium animis, nostros fru-  
strà turbaret, ad concilianda primùm Valachorū  
studia conuertitur. & vt erat exercito per merca-  
turas ingenio, maiori dehinc in omnes beneuolē-  
tia agere; comitatem facilitatemq; grata barba-  
ris vsurpare; nobiliores cultiori in honore habe-  
re. iamq; cū primoribus secretò, iam palàm apud  
mobilissimum quemque, ambiguè de Turca dif-  
ferere. quandoq; duritiem imperij, pudendamq;  
seruitutem exprobrando. alios spe, alios gratia,  
omnes factionibus impellere; nihilq; turbamenti

quo aut



quo aut ambiguos illiceret, aut promptos firmaret, omittere. ut iam appareret, eum socios & partes querere. Neq; verò fugiebant ista Turcas, qui circumdatâ Gratiano, specie honoris validiori quàm antea suorum manu, apertiore famâ, verba, vultum, tacitum etiam murmur, Constantinopolim, aucta omnia, ac velut in annales excepta trāsmittebant.

*Turca id ad-  
uertunt.*

At ille quantò acriora in se Turcarum odia, & auersam Cæsaris voluntatem tacitis nuntiis per-  
fenserat; tantò celerando quod conceperat intē-  
tior: offerre Valachiam, apud nostros instare, pre-  
cipuos quosq; exstimulare: Irent aduersus terra-  
rum ereptores: reciperent suam quondâ prouin-  
ciam, æquitate quàm bello, causâ quàm armis.  
adesse sibi si necesse fuerit, robur equitum, arma,  
viros, fidem partium; nec defuturas Valachorum  
cohortes; seq; in omnia promptum, seu ducem,  
seu exinde militem mallent. Monebat simul ne-  
cessitatis, vastitatem Podoliæ, Russiæ, notaq; lu-  
gubrium cladum nomina sæpius referens: innue-  
bat meliorem esse belli, quàm quietis causam, &  
vbi suspecta pax, tutius bellum. tum ne vltra talia  
per desidiam expectent aut patiantur, adhorta-  
batur. Et nostros quidem his & similibus, ad spem  
repetendæ dominationis erigebat: ipse autem,  
quamuis Valachorum comparata antea teneret

*Gratianus Po-  
lonos ad recu-  
perandam Val-  
lachiam sti-  
mulat.*

*Albuc tamen  
anxius.*

studia; subinde tamen aduersa reputans, metu, spe, ratione, interdum fluctuabat. Versabatur enim ante oculos, Turcarum intentum in se odiū & supplicium; fama crebris exploratorum rumoribus in dies facundior; fauor Valachorum nunc promptus, in periculo forte languidus; & fortuna ipsa, prosperis non ampliora promittens, aduersis nihil medium, sed extrema & præcipitia minabatur.

*Valachos in  
conscientiam  
& rebellio-  
nem trahit.*

*Tributa Vala-  
chorum sub  
Mahomete  
II.*

*Sub Selymo.*

*Nunc quomo-  
do exiguntur.*

Tandem, quod in factionibus securius succedere solet, vno crimine vniuersos obstringere, firmioresque ex conscientia reddere parat. Neq; id ipsi in arduo fuit, apud gentem pridem ambiguum; tum quoque tributis & iniuriis Turcarum grauius quàm bello conflictantem. Nam initio Mahometes modicum tributū Valachis, duo tantum aureorum millia iusserat: mox auctum in annos, & sexaginta millium, vsq; ad Iuoniam eorum Principem, secutis Cæsaribus numerabatur. Factâ posthac contra eum Selymo Cæsari per Principem Transalpinae Valachiae, si Petrus frater dominationis potiretur licitatione, immensum excreuerat; duplicatoq; numero, centū viginti millia aureorum singulis annis arario referebantur. Nunc sublata ista, & quo nihil atrocius, auaritia in crudelitatem versa, quæ iure exigi nō possunt, rapiuntur. non modus, non tempus exactioibus statum;

statum; sed libido tantū Cæsaris, & Principi quod iubetur dandi necessitas. Vnde miseranda ubiq; rerum facies. dispositi à Principibus exploratores, qui in opes cuiusq; intenti, locupletissimos corripere, fortunis euoluere, rapere, spoliare; non sacro, non profano abstinere, sed cuncta in fiscum cogere, nulla miseratione Principum, utpote exterorum; & quibus, pro retinenda dominatione, ista est apud Turcas necessitas.

Ergò postquam his recensendis Gratianus Valachos commouerat; audentiùs onerando, vetus etiam transitionis ad nostros consilium perficit. moxque aqua à Polonis semper imperata tributa, veterem amicitiam, rata pacta, constantem fidem, aliaque conciliando assensu opportuna memorando: tandem redintegrandam ista suadet. Nec ideò, inquam, quasi minor sibi ad depellendum Turcarum iugum, in Valachorum virtute & armis fiducia; verum posse optata, nullo domestico damno, externo periculo peragi. Nam si Polonorum aduersum Turcam necessitatem, tot Tartarorum incursionibus, seruitia, ingenua, plebes raptim abactas, aliaque scelera ob pernicitatem inulta æstiment: bellandum quoque illis aut vetera toleranda. at dum Poloni arma sumunt; posse Valachos quietos in prælio, securos in periculo: postremo si pugna placeret, bellatores etiam in acie  
agere.

*Gratianus  
transitionem  
ad Polonos  
suadet.*

agere. Interea arma fortunamque in integro tenerent: libertatem alienis potius telis manibusque; quam proprio casu aleamque, tentarent. Visuros breui à Polonis referatam Seruiam, Bulgariam, impulfasque; Turcarum vires. Iuuabit inde, aut securam libertate in otio frui; aut armatos vestigijs vincientium insistere. His & talibus alliciebantur Valachi, ut concupiscerent magis quae suaderentur, quam quod in rem esset cernerent. quippe nostros statim interiora rectaque in Græciam aduersus Turcam pergere, exercitum Danubium transgressurum fingebant credebantque. neque, aliam falsi verique curam, tanquam cunctari seruile, properare audendo regium foret; vulgi more post alius alium, quasi prudentiorem secuti, obstricti mutuo foedere, in consilium verbaque Principis iurauere: eò audentius, quò plus fidei afferebat falsa Gratiani miseratio, atque; gratior videbatur Princeps ipse culpae vel gloriae author sociusque.

*Osmanus in eum & Polonos Skinder-Bassam mittit.*

Vix paucis diebus, silentio pressam conpirationem, excepit confestim fama, statimque; Osmanno Turcarum Cæsari tulit. is accitum Skinder-Bassam ire properè, ferreque in Polonos bellum, & Gratianum restrictum vinculis ad supplicium Constantinopolim retrahere iubet. At Skinder-Bassa, dum colligit copias, aduocat itineri milites comitesque (nam & Gratianus aduersus pericula  
cautus;

cautus; & Valachi fauore Principis imbuti, velut nouo bello aggrediendi videbantur) opportunū Gratiano persequendarum rerum tempus & occasionem dedit.

Is enim, cum simulatâ in nostros propensione, Tartarorum incursiones ante sæpius nuntiaret; tum quoque velut imminentem apparatus indicio præueniret; continuus incitandis vocandisq; in Valachiam nostris instare. Ecquid adhuc cererent, à Turca sperari semper pacem, haberi nõ nisi armis & prælio posse? quanquam quid pacẽ? cum tot populationibus, continuum bellum, captaque pridem Russia videatur? Hærerent sanè quieti, sequitur tamen necessitas pugnandi quam fugerent. Inde Turcarum consilia, constans & decretum bellum; præfectum exercitus Skinder-Bassam, & alia quibus accomodatiùs, ipse etiam sui anxius, alios terreret aut accenderet, aperit fingitque. Insuper velut ferendo auxilio promptus, viginti quinq; millia armatorum, commeatum, opes publicas priuatasque, & cætera immodicè vt natura trepidantium promittens, impellere; vt acceptis promptissimis occuparent Valachiam, eunti que occurrerent hosti. hac solâ via Turcam fundi posse; fessum itinere, impeditum locis fluminibusque: si ante ignaro superfunderent, quam ille collectum meditatumque ostenderet

*Gratianus id  
Polonis nuntiat.*

*Auxilia contra eum promittit.*

*Vt ipsi occupant suadet.*

deret bellum. denique si properant, non vilem aduersùm Tartarorum colluuiem victoriam; sed castra Turcica, Valachiam ipsam, pretium laboris gloriæque peti. at si consultant; si cogitant; tenet Valachiam & dimidium facti Tyrannus.

*Ipsè in virūdz  
paratus.*

His & pluribus in eundem modum nostros permouendo; ipse interea magna vi auri argenti- que & pretiosæ supellectilis congesta, diploma à Sigismundo Rege (quo præfectis & procuratoribus prouinciarum, liberum quocunque vertisset illi dari effugium mandabatur) impetrat, velut aduersùm fortunam prouidus, cæterum præsentibus diffidens, occulta spe fugæ.

*Diploma à  
Sigismundo  
Rege impe-  
trat.*

*Poloni quoqz  
in bellum pa-  
rati.*

*Dubitans.*

Interea crebrioribus in dies Turcici apparatus nuntiis, per Poloniam crescebat fama, cui fidem facesque verba Gratiani, & præteritorum euentus addebant. Nec iam dubitatum de bello; hæ- sitationem tantum, pergerentne in Valachiam, an in Polonia opperirentur hostem attulit. Qui- bus enim abduci regno militem displicebat, non ambigua referebant quæ inde sequerentur. Or- bari patriam fortissimorum virorū præsidio, opes priuatas publicasque desereri, aliò nouissimam re- gni fortunam transferri; domi metum, pauorem, & in dubia spe, certa belli mala relinqui. atqui ad custodiam regni miles conscribitur, non qui huc illuc traiciatur & bellum quærat. Si communis

*An à patria  
propulsandū.*

Mars.

Mars, si promiscua bellorum aestimantur; satis tamen casuum, satis periculorum patriæ superesset, quamvis ea valido firmaretur exercitu. quid, si vasta & patens irrupturis hostibus relinquatur? An festinamus adhuc cum Valachis vires & amicitiam iungere, ut primo quoque tempore, toties experta ipsorum perfidia, nos inter omnia infesta & hostilia, in acie corripiat? Ita subsidio Valachis, ita obviam hosti irent, ut & illic tot funerum cladiumque, & hic securitatis publicæ meminissent.

Ad hæc & talia differebatur contra: Multum interesse, in sua quis pugnet terra, an alienam armis metuque teneat. Domi si vincas præmium tibi cruor tantum hostilis, & sævius rediturum bellum: si vincaris tua patriæque captiuitas imminet. at si in adversam ditionem te inferas, ruit inde velut soluta compage imperium. quicquid enim mobile, seditiosum, odio vel metu occultum, mox te præsentem ausurum est in bello, quod in pace concupiuerat. inde nova castra, inde ad manum miles, & quæ nunquam speraueras affutura studia & auxilia. Credendum id Turcarum incrementis, qui hoc pacto, ex paruo pudendoque quadringentorum Scytharum secessu, ad eam quæ cernitur surrexere magnitudinem. vna illis pugna Cappadociam, Pontum, Bythiniam, Asiam minorem,

*An in hostile  
terram trans-  
ferendum.*

Pamphiliam, Ciliciã tradidit. vnus expeditionis impetu, Baiazetes quartus imperator eorum, Macedoniam, Thessaliam, Phocidem, Bceotiam, & quæcunq; ad Bulgaros & Illyricos erant prouinciã in potestatem redegit. Habet nimirum hoc audacia, vt solo euentu facilia demonstrat, quæ segnibus ardua videntur. Ardeat nunc euastetur. que vltior Græcia, & castra Polona, Constantinopolis immineant portis: aperiet & recludet bellum, varias quoque in Turcas mentes, quum alios libertas, alios tædium, graui superboque domino hostes, atque euntibus socios dabit. Verum si neque id adsit; iturus hinc est Polonus eques, religione, fide, moribus, amore sibi connexus. quæ verò contra legiones? qui milites? scilicet è Dalmatia & Illyrico, coactæ Ianissariorum rapinæ, Scythæ, Sarraceni, Epirotæ, mixtusq; ex colluione diuersarum gentium exercitus, cui non lingua, non fides, non arma, non causa militandi eadem: ad breuem impetum validus, vbi sustinueris, aduersis dijs in fugam consternatus, vltra neque imperij, neq; armorum memor. Atqui facilius fuerit tales in propriis latebris opprimere, quàm si domi hæreas, variis frustrationibus pugnam eludentes vincere. Denique legiones illic non milites: & vtrinque homines, vtrinque corpora, exaquet quamuis impares ferrum, vnaque victoria instrumentum sequetis erit, quæ non semper sanguine



guine vel acie, sæpius deditioe gentium, quandoque & fama paratur. Proinde in mediam potius Græciam Thraciamve auertendum bellum, quàm in patria per singulos annos immenso sumptu excitandum expectandumque. & miles hostili dehinc solo virtutem exerceat; quàm domi nitidus & quætuosus militiam per oppida expleat. Neque sanè hoc pacto orbari patriam, quin remotius singulorum periculis hosti viam obstrui. Quid enim profuturum retentum etiam domi exercitum? si vastum nulloque claustrorum interseptum munitum regnum, vix immenso milite custodiri potest? Quærendum tunc quoque bellum esset, & ad inferentem se, vacuis milite locis hostem, huc illuc vertendum agmen. at si in hostile solum infertur miles, simul illuc ista, simul fuga, cædes, cæterasque belli clades à patria transferri: communi equidem vtriusque aleam; sed promptiore ijs fortuna, quibus melior in bello causa. Frustra Valachorum inconstantiam obiectari: quasi non alij quoque aduersam nobis aciem struxissent, & tamen quos diu hostes experti sumus, ciues & amicos continua ac incorrupta fide hætenus habemus. Et Valachi, amicitiam, opes suas, potius nobiscum habeant, quàm si Turca præualeret, arma aduersum nos ferant. Irent igitur & quanto Turcis, modestia, bonis artibus, causa armisque

præstarent, tantò promptius Valachorum fidem,  
& ex hoste victoriam sperarent.

*Transferen-  
dum.*

*Zolkeuius  
primovenit.*

Accendebantur his multorù animi, quos Gra-  
tianus spe & pollicitationibus fouere suetus, acri-  
us impellebat. immotus tantùm ad ea Stanislaus  
Zolkeuius, supremus exercituum Dux, & Cancel-  
larius Regni stetit; non quia diffideret Gratiano,  
qui cautos etiam & prouidos permouerat: sed  
adhuc inerat seni cauta cunctatio, illudq; vetus:  
Omnia prius consilio experiri quàm armis sapien-  
tem decet. At dum alij instare, prælium poscere,  
velut rapturi bellum nisi ducerentur; ne quid e-  
tiam ad odiù militis, qui periculi dum cupit, quã  
moræ patiētior: haud multùm deinde cunctatus,  
audentiora suadentibus, accessit. Itaq; dum col-  
lega Stanislaus Konecpolscius, impiger armis, in-  
gensque animi, vexilla signaque, & quicquid mi-  
litum erat, destinatum ad locum colligit: ipse in-  
terea, filium Ioannem Capitaneum Rubieiouien-  
sem, iam inde à puero cõtubernio militari assue-  
tum, componi itineri & prælio iubet. simul lite-  
ras ad Sigismundum Regem, tanquam bellum  
approbaret, fatòq; prouidus occurreret, hunc in  
modum componit.

*Postremò af-  
sensit.*

*Konecpolscius  
milites colli-  
git.*

*Zolkeuij lite-  
re ad Sigif-  
mundum Re-  
gem.*

Fuisse olim eam mētem Sixto V. Pontifici Ro-  
mano, & Philippo II. Hispaniarum Regi, aliisq;  
Christianis Principibus; vt Turcarum genus re-  
gnorum

ignorū tantum & Christianorum excidijs natū ;  
sociatis viribus, in terris ipsorum armis, belloque  
premerent : nisi inuida magnis conatibus , mors  
Stephani Poloniæ Regis , quæ ei expeditioni Du-  
cem , vnanimi consensu destinauerant ; secreta,  
necdum adulta quæ Senatui & Poloniæ ordinibus  
proponerentur consilia interuertisset. Neq; eti-  
amnum aliud domandæ fadissimæ genti se vide-  
re vtilius, quàm si noster exercitus, in Prouincias  
Turcarum effunderetur. quippe quibus in appe-  
tendis alienis regnis summa audacia , in propriis  
tutandis par formido adesset. Cæterùm cuncta-  
tum se hactenus, ne fortiora consilia secutus , atq;  
cum parua manu egressus patriâ , velut vno ictu  
exercitum absumeret. Iam verò cùm Valachi in-  
uident, auxilia promittant, miles consentiat, om-  
nes virgeant , non se vltra detrectare discrimen ;  
imo cuiuscunq; & seipsum & filium vnicum offer-  
re. Hoc tantum à Deo votis expetere , vt si ali-  
quid sinistri immineat , id suo potius filiiq; san-  
guine & vitâ, quàm exercitus, patriæque damno,  
pietur solatium mortuis & præmium fore , si te-  
neret Rex vtrorumque memoriam : aut supersti-  
tem bello filium fortuna si seruaret, patris vicem  
in ipso neu obliuisceretur. Sibi enim iam actam  
ætatem, certum & decretum mori : hoc solum se-  
ni fesso laboribus, & expeditionibus relinqui; no-  
uissimum.

*Bari 25 Aug.*

uissimum spiritum domi inter contumelias, an in acie per fortitudinem effundat.

*Dein pergit  
in castra.*

*Numerus mi-  
litum.*

Talibus firmatus ad castra pergit; ubi datum iussu Konecpolscij viae signum, & militem in armis inuenit. mox acceptus in medium, signa ferri iubet. Quinque millia militum erant, paru<sup>o</sup> equidem numerus, sed si concordia adfuisset, cum virtutis haud peniteret, in ferendo quouis bello sufficiens. sequebantur Kosakorum duo tantum millia. alij reuoluendo odia, quibus acerbior in coercendis ipsorum, aduersum Turcas excursionibus fuerat; quietem, gloriae & gratuita militiae praeposuerunt. Vix penetratum erat ad Tyram, agmenque trajici fluuio captum; confestim non rumor, sed trepidi vndiq; nuntij per Valachiam incedunt: Polonos iam terra potiri, ingentem exercitum rapi agique. quae cuncta sperata Gratiano, subdita adhuc ab ipso atrociori fama; quod in caedem Turcarum se obseruantium, Valachos metu vel merito Polonorum promptius impelleret, in maius attolebantur. Tum vero audentibus paucis, non populus modo, & parata alienae audaciae plebs: sed equitum & nobilium plerique; posito metu incauti; tanquam deinde per flagitium, apud nostros, fauori praemioque propiores, in caedem Turcarum ruunt, ignaros trucidant. sanguis, mors, vulnera passim: nec vlli modera-

*In Valachia  
Poloni intrant  
3<sup>o</sup> & 4<sup>o</sup> Sept.*

*Turcae a Valachis ceduntur.  
5 Sept.*

tio aut finis; sed permissâ vulgo licentiâ, donec inuisa gens & facietas permansit. Pauci tantum Turcarum, quos fuga fortunaue subtraxerat elapsi; per longinqua & auia, integri, pars vulnerati, Skinder-Baldæ iam Valachiæ appropinquanti occurrerunt: simul Gratiani conspirationem, Valachorum defectionem, nostrorum irruptionem, vera falsaq; in modum metus & periculi attolentes, retulerunt.

*Qui elapsi  
Skinder-Baldæ  
se occurrunt  
& omnia nuntiant.*

Peruenerat quoq; ad castra Polonorum de cæde Turcarum fama, quæ adeo militem mutauit, ut quasi debellatum fuisset, contemptius inde vagari, prædam velut in hostili solo exercere, atque disciplinam, quam utcumque hactenus Turcarum timor, & Valachorum suspecta continebat fides, remittere inciperet. Vnde alius & Valachis animus, cognita insuper paucitate: non tamen pro pensio in Turcam, sed odium in utrosque par; ex Turca si præualeret etiam metus. Verum nondum speratâ virtute nostrorum, neutri parti adhærendo, opperiri futura, atq; ex euentu bellantium, abnuere aut agnoscere fortunam, faciliore apud victores, excusatione aut veniâ, decreuerunt. Gratianus quoque, qui incertum omiserat an distulerat contrahere promissas copias, ubi minorem spe exercitum aduenisse, certiori nuntio accepit: vitatis nostrorum castris, recta Chocimum conterminâ

*Poloni auditi  
cæde Turcarum  
securi.*

*Valachi quibus  
adhærent.*

*Gratianus suam  
meditationem.*

E

Russicæ

*Sed eam impedit Zolkeuius.*

*Gratianus venit in castra Polonorum 7 Septembr.*

*Cognoscuntur sed premuntur à Ducibus Gratiani artes.*

*Gratianus benignè habetur.*

*Conuiuio excipitur.*

Russiae arcem flexit, nec iam de imperio sed de salute sollicitus, quomodo per Pokuce, prouinciam nostram fugâ in Germaniam euaderet, circumspectabat. Sed occupauit Zolkeuius ea consilia, inuitatum enim per literas, ubi necere moras; necdum collectum militem, & sæpius incerta vanaq; respondere didicisset: id fortè quod meditabatur suspicatus, vt veniret in castra seuerioribus literis admonet. quibus ille territus, certo si abnuisset exitio, vltra nec fugiendi nec manendi potens, consilium cui impar erat, fato permittit. Itaq; non multò post, paucis suorum comitatus in castra venit: auertenda suspitione, lætitiâ & gratulationem vultu ferens; animo anxius, & deteriora metuens.

Suspectabantur iam inde à Ducibus Gratiani & Valachorum artes; pars tamen sanitatis erat illas premere, ne deprehensæ à milite, quem confidentia, & spes donatiui à Gratiano, promptiorem ad officia dabat; turpem in castris ante prælium trepidationem concirent. Igitur Duces metum & noxam conscientiae Gratiano pro pena factis esse rati: tum eo in castris habito, Valachos ad se inclinatuos sperantes, in simulationem compositi, omnia honorifica vt in Principem vsurpât. adhæc ipsum & comites donis deuinciunt, adiectoque conuiuio per epulas & vinolentiam consilia,

lia, copias, animum hostium ab eo expiscantur. Sed non ideo incautus Gratianus, cuncta reconde-  
re, numerum extenuare, septem, nouem, octo millia Turcarum adesse, dicere, negare. Id plerisque nostrorum suspicioni, pluribus audaciæ fuit. nec deerant qui Ducibus instarent, vt versus Techiniam & Belgradū (quò antea destinauerant) indeq; in Tartarorum sedes bellum ferrent. Sed Duces metu pauci exercitus, simulq; Valachos alio victoriae pretio in deditiōem pertrahere volentes, gloriam potius retinendæ Valachiae præposuerunt. Itaq; ire inde versus oppidum Cetforam, camposq; & locum, quem olim Ioannes Zamoscius infederat, occupare ipsis visum.

*Ille nihilominus cautus numerum hostium extenuat.*

*Duces mutant consiliū de sede belli.*

Aggregabantur interea ad Skinder-Bassam, magna Turcarum & auxiliariorū copia. aderat Galga Chami frater, & Kantimir cum ingenti Tartarorum exercitu. quin aliquot primores Valachiae, ad Turcas profugi, exemplo, reliquos in deditiōem & auxilium belli pertraxerunt. At Gratianus in castris nostrorum iter & tædium ducens, non iam Princeps aut auxiliarius, sed belli tantū causa: incertum, spe adhuc, an quia proditis quoquo modo nostris, tutiorem fugam vel meritum apud Turcam putaret; militem ad prælium & festinatos casus continuo impellebat. Facile, inquiens, oppressuros Skinder-Bassam, si improuisi longin-

*Galga, Kantimir cum exercitu Tartarorum veniunt.*

*Valachi ad Turcas transfuerunt.*

*Gratianus tamen turbat.*

quitate itineris fessum, sine Scythis inualidū, excursione valida adorirentur. nam & fortes subitis terreri, & audaces à fortuna iuuari sæpius expertum. Acceptumq; vulnus nimia fiducia fuillet; nisi Duces prudentes, militem sub imperio & vexillis tenuissent.

*Figitur belli  
sedes ad Ce-  
soram oppidū  
12 Septemb.*

*Ibidem castra  
metantur.*

*Odrziuolscius  
specularum  
missis con-  
silia hostium.  
cum hostibus  
v. det.*

Ventum deinde Cetsoram, missusq; cum expedita manu Odrziuolscius, specularum consilia, animum, itinera, copiasq; hostium iuit. alij ad expediendos commeatus, cæteraq; quæ in rem videbantur dimissi. Zolkeuius verò ingressus dimensa olim à Zamoscio castrorum vestigia; sed diruto vallo, & humili fossa, reliquas legiones reparare iubet. Mirum, quàm fides Gratiani, & quia nulla euntibus apparere arma, securū ideoque lentum ad obsequia dabat militem. Quid enim aiebat sibi à Ducibus decerni? nimirum vt nomine militiæ, cumulos terræ & fossorum operas accipiat. Propria militum arma manusque. faminis tantum & imbelli vulgo fossæ & vallum. salus. quibus nunc cum hostis deest, abditos se aduersum campos tenere Duces parant. Ast vbi ingenti tumultu, Odrziuolscium & hostes aduolare, aspectus fama; eadem tulit: tum verò intendere operas, circumagere corpora: & vt trepidis rebus contingit, alter alteri præcipiendo, suamq; ignauiam obiectando; aduersis imperium desiderabant,



derabant, quod prosperis datum non intelligebant. Deductum tamen postea opus minori trepidatione: quia nec barbari, turbare munitiones ausi; & quanquam vicino hoste, multitudinem tamen armorum, propinqui colles, arbustaq; occultabant. Signum deinde frumentatoribus tormento ut redirent datum. pars regressi: plures onusti præda, aut palantes per agros, in manus hostium circumuenti venerunt. Iam quoque flexus erat ad vesperam dies: nec hostis tunc certamen ausus, militem quiete, velut timoris indicio, ad futurum prælium acuebat, redibatq; remissa hactenus virtus nocturna meditatione belli.

*Illo die abstinetur utriusq; à prælio.*

Orto die Turcæ & Tartari, quò discreti manifestius spectarentur; sibi quæq; gens separatim, per turmas & vexilla compositi, steterê. Illorum, octo millia, ad dextram, edito montis, qui Cetso-ræ superiminet: horum triginta millia, supercilio haud procul distantis tumuli, qui Delidolinæ (sic loco a profunda valle dicto) adiacet. Secunda ferme hora diei, ferocissimi cuiusque nostrorum præcursu, prospero euentu crebræ velitationes, in longum diei productæ: iamq; ex fortuna & ira ardescensibus animis, infecta etiam nostrorum signa in apertum effundebantur. Sed hostes haud fidentes suorum virtuti, frontem & latera relinquunt. inde circumgressi ad ripam Pruti, tota vi, in leuis armaturæ militem, munitionibus castro-

*Hostes compositi per vexilla constitunt 18 Sept.*

*Velitationes.*

*Tartari in Velites incur-runt.*

*Dinophius cū  
suis erumpit,  
& pugnam  
restituit.*

*Velites pel-  
lunt Tarta-  
ros.*

*Tartari re-  
trocedunt.*

*Eorum con-  
suetudo in  
pugna.*

*Zolkeuius re-  
ceptui canere  
iubet.*

*Poloni fero-  
ces.*

rum adiacentem, cui Valentinus Rogascius Mo-  
schouitica expeditione, iuxta ac paulo ante fa-  
cta in rebellem Vngariam irruptione, victoriaq;  
clarus præerat, incurrunt. Turbabanturq; densis  
Tartarorum cateruis leues cohortes, ni Dinophi-  
us bello strenuus, manuq; promptus, cum aliquot  
turmis equitum, citato aduectus equo, rem pro-  
pè inclinatam restituisset. Tum verò accensi me-  
liore successū Velites, ne aut accepisse aut deside-  
rassè auxilium viderentur, valido impetu conni-  
xi, quantò ferocius accurrerunt, tantò acrius in-  
fugā pulsos barbaros disijciunt cæduntq;e. Iam-  
què haud procul iusto prælio res fuisset; ni hostis  
nudato campo, exercitum in colles pristinos pro-  
perè subduxisset. Id signum percussi fuit, an ad a-  
stum conuersi, incertum. Nam cum apud Tarta-  
ros, cedere consilij potiùs quàm formidinis sit, ita  
dehinc cautè pugnatum, vt nullus audentius in  
nostros effusus, capi vel cædi potuerit: sed velut si-  
mulato pauore, quò nostros fuga inescatos, & lon-  
gius euectos dolo circūuenire animus esset, refu-  
gere videbantur. Sensit ludibrium & astum  
Zolkeuius, signoq; receptui dato, ardorè & fortu-  
nam militis repressit. nec ille vltra institit, cui se-  
quēdi desiderium nox etiã & lassitudo ademerat.  
Irritatus tantum Polonus reducit in castra,  
ac prosperis ferox, optando diem aduersus elu-  
dentes

dentes hostes, ultionem fremitu & iracundia explebat. mox velut ingrata veniret nox, quæ in posterum diem dubiam certaminis expectationem faceret, circumfistit Duces & Centuriones, oratq; Ne pugnam differendo, abditos ultra in vallomore fæminarum tenerent. non enim fossam aut vallum sibi, sed corpora & arma in hostem data. neq; se in spectaculum fugientis hostis, sed in bellum assumptos. Itaque aut certamen sibi Duces, aut si quies placeret, emensis tot itineribus, maturum otium concedant. Et verò premebat Duces, præter militum preces necessitas in loco, vbi nec sperare vllam opem poterant, & si diutius moreretur, annonæ propè inopia instabat. Sed quanquã magis suorũ animis, quam viribus fiderent; non ignari tamen, primis ausis, hosti metum aut fiduciam gigni: statuunt ostendere aciem, & dato die prælium incipere. Atque cum deliberabundi de crastino prælio, capita conferunt; fortè intercep-  
ptus à vigilibus vagus è Tartaris adducitur: cuius indicio ceterum millia hostium adesse cognoscitur. Differre inde summam certaminis Duces Centurionesque parabant: sed miles impatiens moræ, quaterè arma, nolle requiem, optare lucem. Videret tantum aduersos, ac si ab imperatoribus non daretur, se ipsum occupaturum tempus & occasionem pugnæ minaciter strepebat.

*Summam certaminis in crastinum deposcunt.*

*Nec Duces abnuunt.*

*Cognoscitur à Tartaro capteuo adesse hostium 100000.*

*tunc*

tunc aut hostem contempserant; aut quod tantis velut referebatur copijs, iuorum non restaurasset fugam, illius tantum numerum adesse haud credebant. Ergo & Duces, ne aduersa militi cunctatio, audaciam quam in victoriam fouisse par erat, eximeret: relicto valido à tergo castrorum, quâ fluuiio diffidebatur præsidio; postero die auidos certaminis in apertum hoc ordine producut.

*Instruitur Po-  
lonorum a-  
cies 19 Sept.*

Vna & altera carrago, quas lixæ agerent, ex cētum circiter vehiculis conficitur. vtriq; à tergo, fronte, & lateribus quatuor tormenta, insuper aliquot bombardarum sarraca adduntur. Tum sic instructæ, facto pediti spatio, quo inter vehicula & tormenta commode reciperetur; ambræ duabus castrorum portis simul emittuntur. addito præcepto, vt pariter præcedentes, eatenus ex æquo progredierentur: quoad relictus in medio campus, succedentes sibi legiones, totumq; exercitum reciperet. Sed incallum imperia data. nam cum Ducum alter, graui senectæ vix omnia per se interuifere posset: alter vt ordo agminis in aciem adlisteret, emittendis cohortibus attenderet: aut plurium securitas vel audacia obsequium eximeret, sinistra carrago haud procul vallo substitit. dextra quoad manipuli explicabatur vltra quam satis progrediens, frontem propriumq; latus latè & longè nudauit. Adeo vt & vis tormentorum,

quæ

*in Polonia gestarum.*

41

quæ ideo pro castris & carraginibus ad se versus directa erant, vt quacunq; intrantem exciperent hostem, distantiâ languesceret: & quæ quadrata acies stare debuerat, laxatis ordinibus, dextrum cornu in enormem inutilemq; mucronem porri- geret. Vbi sic legionum agmina stetere fulgen- tibus aquilis armisque; Turcæ quoque & Tar- taria, à suis Ducibus, vt nouo semper & coniuncto orbe, frontem lateraq; incurfantes, pari vi & ve- locitate nostras acies rumperent, simulq; recurre- rent, in densos cuneos compositi emittuntur. Atque qua frontem dextrumq; latus infirma con- spexerant, illic truci ac tû primum quod nunquã credebatur, immensoque agmine incumbunt.

*Nec hostes de-  
treclant pu-  
gnam.*

Excipiunt hanc nostri intrepide barbarorum vim, primoque impetu aduersos impellunt tru- duntque. atrox inde Tartarorum cædes, nec mi- nor tormentorum fulmine à Theophilo Sem- bergio è dextro maximè cornu in temere effusus edita strages. passim corpora & laceri artus, e- quorum virorumque cumuli, vt propè difficilior tum hostibus, per suorum cadauera; quàm dein- de per nostrorum legiones fieret transitus. Sed ea nostris non diu durauit fortuna; mox enim ab ex- tremo laterum, vnde tormentorum globis obrue- bantur amoti hostes, in media patenti & innoxio campo irrumpunt. Tunc verò plurimus vtrinq;

*Theoph: Sem-  
bergius.*

F

labor:

*Zolkeuij duo.**Wrzescius,  
Goslicius,  
Koualkouius,  
Dinophius.**Dux Korecius*

labor: barbarus densis cuneis hac illac impetit; stat contra obnixus Polonus, & quanquam accipit maiorem infert cladem. cedit ille moxque recenti globo remeat; sternit hic, ac transuersum aut obuium quacunq; datur proruit: donec deficientibus lassitudine viribus contumaci animo resisteret magis quam pugnaret. Tum inter primores duo Zolkeuij cum propè cedentem viderent aciem; infestis hastis in confertos prouolant, totumq; secum dextrum mouent latus. sed audentius illati iuuenes, obruti ibidem telis, haud inglorij equis defluxere. Neq; segnius fronte arma gradumque miles retinebat, verum laxatis semel ordinibus, haud multum ibi quoq; prodesse virtus: fors cuncta miscere, & strenuissimi quiq; dum acrius pugnam cient Wrzescius, Goslicius, Koualkouius, primipilarij cadunt. Inter quos Dinophius deleta pene sibi cohorte, cum aliquot tamen militum, voce, manu, vulnere, sustentabat pugnam. Pulchrum quoque erat in sinistro latere Ducem Korecium videre, haud ita multum Constantinopoli captiuitate elapsum, per Turcarum centuriones circumferentem truces vtricesque oculos: nuncq; singulos prouocantem, nunc increpantem omnes. deinde cum sustinere iram non posset (hostes enim illic nostros confertos tutosque loco suggredi propius non audebant) obuer-

fis:

sis cominus armis acriter prouolantem: cum quo duos quoq; eodē latere Chmielecium & Ferenbachium virtus pariter exemplumq; in hostes agebat. Ita prælium grauius & atrocius vbique crescebat, non enim solum centuriones Nicola<sup>9</sup> Strusius Capitaneus Haliciensis, Martinus Kazanoui<sup>9</sup>, Alexander Balabanus Capitaneus Vinnicensis, Ioānes Tyskeuici<sup>9</sup> & alij ad regendā consilio rem affuere; sed suismet ipsi corporibus dimicantes, miscuere certamina: nec quisquam postea procerum hâc aut illâ acie incruentus excessit. Quin & Konecpolscium totâ volitantē acie, fortuna magis deserebat, quàm virtus. sensit solum agmen; accurrit: retrahere carraginem dextram nititur; sed frustra: formidine dilapsis aut abditis calonibus. neque etiam confusa huc illuc vehicula, amplius explicari, aut abiunctis equis moueri loco potuerunt. Ille tamen constantis Ducis aut fortissimi militis officium non deserre, accurrere, adire, hortari; auxilio, exemplo, laude. Post vbi dextro cornu vexillarium circumuentum à globo hostium videt; velox inter tela se immergit, duobusq; manu obruncatis signiferum & aquilam seruat. Prælium deinde varium, anceps; his, rursùm illis exitiabile: nunc vt cuiq; virtus aut audacia prorumpere vel reuehi; nunc sine cura regentium, alter alteri opem ferre vel

*Chmielecium,  
Ferenbachius*

*Strusius,  
Kazanoui<sup>9</sup>,  
Balabanus,  
Tyskeuici<sup>9</sup>.*

*Konecpolscium*

*Prælium varium.*

accipere: non sanguinem non vulnera morari: quoad deficiente die & viribus, obscuro iam noctis, fessi castra repeterent. Producebat tantum in dextro cornu praelium desertus pedes, quem difficili effugio implicitum, vehicula tormentaque tenebant. sed nec ipse spe aut viribus par diu vim tenuit. multi illic capti unaque caesi: caeteri vano impetu, quacunque exitum ostenderat spes sese eicientes, a tenente circum omnia hoste interiére.

*Almadi.*

Vnus Almadi Vngarus, praefectus peditum, cum viginti & aliquot insuper suorum, duplici vulnere faucibus, cuneo viam ad castra fecit. Tardè post eum Sembergius, diu aduersos iaculatus, dein ab omnibus desolatus, per bella tamen & aduersa multum exercitus, eoque tunc etiam interritus & in periculo sapiens, solus, immixtus ignarusque hostibus, audacia & errore euasit. Caesa eo die hostium tria millia & quingenti: maior numerus vulnerati. Nostrorum trecenti quinquaginta desiderati. duo tormenta tempestiue subducta, reliqua quae erant cum dextra carragine, & ipsa carrago amissa. Stetissetque haud dubie sine sanguine & damno nostrorum victoria; nisi quae communis est militum querela, carraginum adfuisse audacia vel temeritas.

*Numerus caesorum.*

*Novum malum.*

Sedato praelio grauis receptos intra castra milites timor incessit: nullo nouo periculo, nisi quod



quòd peruigilium & tenebræ, diurnam difficultatem in metum & curam trahebant. Fatebantur enim, nunquam pertinaciorè pugnâ cum Tartaris conflictum fuisse, & ni eosdem retrò nox & fortuna egisset, versatam in discrimine summam rerum; à quo etiamnum haud procul abesse, vndiq; clausos, nullo patriæ subsidio. Vnde enim posthac pabulum equis, alimonia militi, aut alia quæ ex otio aut necessitate castrorum parantur? Nempe obsessis ac velut captis, superesse tantum mortem ac æternam obliuionem, quam immensâ illa Tartarorum vis aut fames adiiceret. Recurrebat præterea infaustus in Valachiam ingressus, quem effusus tunc in profluentem Nestrû, nitratus puluis, & cum moueretur agmen, nulla violentiâ, signum imperatoris fractum, portenderat. pluraq; alia, quæ securitate neglecta; timore, vt Dei ira, vt omina, vt fata resumebantur. Inde non metus iam per castra, sed pauor & infelicitis belli execratio: cui extracta quomodocunque nocte, nouum dies & Gratianus flagitium addit. Cùm enim ipse diffidentia præsentium vereretur, ne traditus Skinner-Bassæ, supplicio suo, metum simulq; belli cõtrouersiam componeret: remedium periculorû ipsa pericula ratus, eò acrius inferere se trepidantibus, vrgere metum, aggregare pericula, suadere fugam, ostendere viam; quam si se duce & co-

*Omnia visa  
intrando in  
Valachiam.*

*Gratiani sce-  
lus.*

mite capefferent, immunes à periculo, breui aut recto itinere per Pokuce; aut obliquo per Transylvaniam penatibus suis redderentur. Alliciebantur his faciles per metum quorundam animi, nec vitæ postea nec gloriæ compotes, incedenteque pestifera per caltra lue, cupidissimi quique in scelus aggregabantur; cæca spe vitæ, nulla pudoris cura, ignaris Ducibus centurionibusque.

*Gratianus fugit.*

Iamq; nox teterrimo facinori opportuna aderat, & Gratianus ad præterfluentem amnem præcurrens, primus viam fugæ exemplumque dedit. Fluvius is ponè terga castrorum decurrebat, quōdam Hierassus, nunc Prutus dictus: altero littore tenuis, sylva Fagetulana, accolis Bukouina dicta, quod eius arboris frequens sæcundaque sit, imminabat. Illuc ergo Gratianum secuti qua cuique proximum sese proripiunt, lugubri spectaculo & obuia pæna; dum alij vadorum ignari præalto & subdolo amne haurirentur: alios densi raperent traherentque vortices: aut si qui in alteram partem elati; statim à Scythis & Valachis, in sylva ipsisq; latebris trucidarentur. Duces cum Centurionibus egressi, cum frustrâ reuocare fugientes, nec imperio, neq; autoritate, ne precibus quidem & manu valuissent; amnis, hostium sæuitia, & proprium cuique periculum, quò minus maior pars effunderetur obstitit. Gratianus equo in alteram

*Bukouina sylva.*

*Gratiani exitus.*

teram ripam elatus, exitium quod euaserat, ad breue tempus latebra distulit. exceptus enim misericordia vnus Valachi, eiusq; tugurio abditus; claritudine infausti principatus, spe premij & perfidia eiusdem Valachi trucidatur. Sed Alexander Princeps deinde Valachiæ, caput eius sibi delatum, non premio, sed simili in proditorem ultione pensauit; solito Principibus metu, & ad futura munimento, ne quis simili facinore, paratum ex diuerso apud alium, præmium etiam ex se speraret aut peteret.

Interea calones, lixæ, & qui fortunam vbicunque inueniunt amant, dum vigilias, stationes, castra etiam relicta vident, irrumpunt contubernia: sarcinasque militum, tabernacula Ducû, & quicquid vsquam spem inuitaret scrutati, omnia vt prædam, aut spolia inter se rapiunt. direptis potioribus, residuo faces iniiciunt; desperato fortasse aliorum reditu: aut populatione velut fortuita ignis, raptus velamen habituri. Neq; enim ullus obuius, aut moderator licentiæ aderat; pars comitatu, vel simili officio cum imperatoribus occupati: pars fuga, aut timore dilapsi. atq; tunc primum ad ferendam opem confluebant; cum magnam iam castrorum partem flamma aderam, & ni extinguendo anteirent velocitatem mali, haurire cuncta incendium cernerent.

*Castra accenduntur & diripiuntur.*

Redierunt:

*Miseranda omniū facies.*

Redierunt tandem in castra, multi inuiti, plures nocētes. quo cum intrassent, miserabilis commilitonum memoria, præsensq; castrorum deformitas, adeò pauentes confuderat; vt etiam à Cēturionibus impulsī, non progredi loco possent, non tutari vallum, non animo, non lingua, non auribus competere. Victorum tantum aut captiuorum habitu, defixo in ruinas & busta vultu stabant; lugubri per omnia prospectu, velut reorū agmen, & funebres exequiæ. Ipse Dux calamitosa senecta, ante lacerum & semiustum tentorium, raptus, defectionem, quid castra? quid ipse, quem deseruerant deplorando, nocentiores faciebat: eò impensius, quod ne tum quidem vecordes conscientia, odium in Duces & Centuriones ponerent; familiari militum consuetudine, culpam quā deliquerant, cum inuidia rerum rectoribus imputando. Fecerantq; vt & Duces timerent contumaciam eorum, hætenus incerti, periculosiorne foret seueritas an clementia; infectis pluribus, quasi valetudine & contactu. neque tamen vllus in iudicium vocatus; dissimulantibus integris, parata fortasse apud nocentes aut confcios peruicacia. Atq; nisi viteri⁹ Duces & Cēturiones salubri cū Skinder-Bassa tractationū simulatione, confusionē illā exemissent, simulq; hostiū vim cohibuissent, haud procul iā ab exitio aberāt.

*Prudentia Ducum.*

Quan-

*in Polonia gestarum*

49

Quanquam & tunc, Deus ipse, fortunaq; gentis ipsos tutata est, quæ Turcis Tartarisq; aliam potius mentem, quam hostium dedit. Adeo dum varijs frustrationibus per octiduum eluderentur, nulla spes, non potiundi modo, sed ne adeundi quidem castra Polona animos illorum cæpit: sed forte confusio ipsa procul visa, flammaq; piacularis castrorum, terruit tenuitque volentes, ut in vasto & deserto campo, inter tabem pecorum hominumq; desides tempus tererent: donec fidente paulatim metu, quæ Ducum, quæ centurionum, aut quicquid castrorum sincerum erat, cura; obsequium etiam nostris, & parenti amor, quod solum ipsis defuit, cum virtutem non argueres, pararetur. Tum ergo vbi iam æqualius & reuerentius regi poterant, iactata sapius per centuriones irritis nominibus spe pacis, imperator concionem classico aduocari iubet. quæ vbi frequens aduenit, ipse cum dignitate alia corporis, tum senecta maiestatem præferens, filio, primoribusq; prosequentibus processit. Mouit milites præsentia viri, memoriaq; fortunæ & virtutis eius, cumq; sermonem exspectarent, diu quoque Dux tacitus stetit: haud perinde iudicio vel seueritate; sed dolore victum apparebat loqui non posse. postea quasi à luctu requiesset, collecto animo ita orsus est.

G

Si eam

*Historia rerum*

Si eam quam ex obsequio & virtute exercitus mei gloriam capiebam, incorruptam quandoque à me retineri dijs cordi non esset, maturam ante & sine noxa mortem mihi exoptabam. tunc enim vitæ socia, & mortis comes eadem gloria fuisset. Nunc verò eò me longa vita, & infelix senectas traxit, vt tot malorum exercitui meo conscius, vix morti honestæ locum reperiam. Satis, satis, ne hucusq; durassem honorum mihi, nimium vitæ fuit, mori me pridem, aut si segnis mors erat deponere hoc imperium oportuit. Neque enim vbi fuerim scio. an apud milites meos? quibus proiecta ducum auctoritas, desertus hostibus imperator. an in castris? quæ lacera, deuasta, speciem nunc horrendæ vastitatis habent. Atq; ego procul iam ista amoueo, neque in vos facinus vulgatum volo. Illorum sanè is furor & amentia sit, quos à contactu vestro vltor segregauit punitique Deus: vt tamen illorum tantùm sit, à vestra virtute expectatur; sine qua nec dolor inuidiaq; ab imperatore vestro, nec à vobis alienæ culpæ suspicio aberit. Equidem meminimus, fatemur; pugna stitit strenuè; soli in acie, soli in castris mansistis. hæc tamen quæ nobis palam, cæteris in occulto sunt, & nisi eadem nouo decore, ferro per confertos hinc egrediendo hostes demonstratis, quis credet, aut ignoscet? Videtis non aliud nisi

fame

*in Polonia gestarum.*

fame & siti pereundum sit, quàm vt hinc abeatís  
relinqui. Absoluite igitur necessitate virtuté ve-  
strâ, atq; istud adhuc adiçite, facite eos qui vos  
deseruerunt, victoria vel morte nocentiores. Non  
hoc refero tanquam perituris, sed etiam si caden-  
dum esset, ideo vobis acies, ideo tela, ideo ho-  
stes datos putarem. Nunc cum vos considero,  
cum facta vestra æstimo, non mortem, sed pul-  
chram & spectabilem victoriam à vobis expecto.  
Nam ne ignoretis cum quibus hostibus vobis res  
futura sit, vestra decora recensete, vestros oculos  
interrogate. Ij sunt de quibus viginti & quinque  
retrò ab hinc annis, duce Zamoscio, memorabile  
decus domos ad coniuges & parentes vestros re-  
tulistis: ij quorum cineres ossaq; hoc ipso in lo-  
co deuicta calcatis. Et iste vos circumstans igna-  
uorum est ac metuentium numerus, quem per  
hos dies desidem, ne castra adoriretur, ne malis  
vestris exitium adijceret, timor propriaq; despe-  
ratio tenuit. Sed quid ego hæc recenséo? non  
tantùm milites decus de hoc exercitu, toties vi-  
cto, caeso, fugato: quantum gloria seruandæ à vo-  
bis patriæ æstimanda est. Quæ enim alia sunt do-  
mi nisi vos vincitis castra? quis alius exercitus?  
pro patria, pro ciuibus, pro coniugibus & liberis  
vestris vobis decertandum est, & nisi perrumpi-  
tis hostem, iam intra patriam erit, per vrbes, per

prouincias vestras ferro & igne grassabitur. Ostendite ergo Regi & patriæ quales vos sibi milites seposuit, quibus acies, arma, incolumitatem propriam commisit. non enim relictis hic estis, sed electi ut vincatis. En ego imperator vester clara voce in prælium voco. En si aut hauriendus aut dandus est sanguis, primus caput hoc in omnem aleam lubens deuoueo. Vobis si idem est animi, mecum quoque arma & manus expediendo, approbate nunquam vobis aut in victoriam, aut si perire etiam necesse fuit, animos in mortem deuisse. Hoc me tantum dolore inuidiaque: hoc vos quicquid hactenus ausum temeratumve aliena culpa absoluerit. Constantia orationis, & quia experta difficultas spem omnem inciderat, terruit simul audientes & accendit. nihilque (ut postea fatebantur) adeo confirmauit, quam vultus imperatoris impavidus, voxque nulli periculo cedens; ut appareret multum in illo senili pectore, non consilij modo sed etiam virtutis virere. quod ille nequaquam sefellit, sublatoque à concione clamore, ut in hostes duceret, facile postea demonstrauit, validiorem Duce & obsequio, quam numero & ferocia rem ipsorum esse.

*Milites resumunt animos.*

*Poloni itineri  
& prælio com  
ponuntur 29  
Septembr.*

Igitur ubi satis animos militum explorauit, iij Kalendas Octobris vniuersum exercitum vallo munitionibusque educit. Fronte & tergo tormenta,



menta, medio currus vehiculaq; septem ordinibus inceſſerunt. hæc antepoſitus proprijs ſignis eingeſſebat miles. introrſum impedimenta & equi recepti: quippe ſolum tunc in pedite robur, quia procurrere reuehique non ſane tutum, ne diſtraheretur paucitas. Poſtea optimus quiſq; ad periculoſiora loca conſtitutus. Korecio & Ferensbachio ordo primi; Kaſanouio medijs agminis committitur, homini militari, & qui amplius triginta annis, aut miles aut centurio in caſtris fuerat, eoſque ipſos milites, & fortia facta eorum nouerat, ſubindeq; memorando animos illorum accendebat. Sembergio tormenta & extremum agmen permiſſum. His ergo ita prouiſis paratiſque, flexo iam ad veſperam die, exercitum Zolkeuius ſignaſque itineri mouit. Hoſtes quoq; per aliquot dies nequicquam deſides, & tractationibus tantum deluſi, cum præter opinionem armatos ac velut auctos viribus abire cernerent; repente circumfuſo toto virorum equorumq; agmine, quacunque eunt perſequi, laceſſere ad pugnam: primo obequitando prouocandoque, deinde per occaſionem huc illuc irruendo: poſtremo irrito vndique conatu, diuiſis inter ſe copijs, pars infeſtando agmini relictæ, pars prægreſſi, qua mediâ nocte per fluuium noſtris eundum erat, tranſitum occupauerunt. Et turbabantur primo impetu,

*Ab hoſtibus  
tota nocte fru-  
ſtra infeſtan-  
tur.*

fluitantes labantesq; lubrico nostrorum ordines; mox tamen totis corporibus connixi, ruperunt continuaueruntque viam.

*Luce prima  
metantur ca-  
stra 30 Sept.*

*Iter ingredi-  
untur.*

Sub ortum solis constituta signa, simulq; cæptus dies truci clamore, horrendoq; barbarorū iono, qui pertinaciter contra circaq; ingruendo obruerē ac obterere paucitatem nitebantur. Sed cum obsequio & reuerentia Ducum, non fortuna iam magis, quàm virtus pro nostris stabat, pulsiqu; ingenti tumultu hostes, tempus etiam transferendi castra tutiorem in locum dederunt. Cæptum iterum primis tenebris iter, vt aliàs inquires, turbulentum; nam præterquam quod continuo sub armis enitentem exercitum paludes montesque fatigabant: crebra quoq; prælia, prouisa, subita, per saltus, per sylvas, sæpius in modum latrocinij, nec milites, nec centuriones, nec Duces remittere laborem permittebant. Neq; hæc tantum, sed etiam omnium incertos, nocturna ignoratio, ictus, sonitus, bellantium, accurrentium, euntiū, à tergo, à fronte repercussæ voces huc illuc distrahebant turbidis clamoribus. Et cum eadē continuo acciderēt, tamē velut assueti malis obstinato ad mortem aut victoriam animo, constanti gradu ad lucem prosequerentur iter & prælium.

*Skinder Bassa  
nequicquam  
oppugnat ca-  
stra 1 Octobris.*

Prima hora diei, profundam vallem intrantibus, vix spatio consistendi dato quietem rursūm exemit

exemit Skinder-Bassa; sperans enim illic ingenti suorum agmine, ac pulsu sonituque velut nube operire ac superfundere fessos, omni ex parte illos aggreditur. Sed nihil & ipsi territi, in orbem se colligere: ad omnes partes pugnam intendere: donec fortiter superato impetu, mox etiam ingenti strage subeuntes pellerent funderentque. Tunc verò nequicquam & cum damno tentata aliquoties oppugnatione, cum vis negligeretur, differendam, potioremque dolum Skinder-Bassa ratus, ficta modestia ad Duces mittit. Posse, in-  
quiens, de reditu ipsorum conditionibus transigi, nec committendum vtrinque, ut tantum egregiæ pubis fortissimorumque militum, nullo sane pretio sternetur. Non enim internecium cum Polonis geri bellum, & satis quoque sibi gloriæ partum, si temere occupatam redderet Casari Valachiam; & ipsis abundè accersurum, si nondum victi, oblata ab ipso hoste pace, belli ambigua, nec sibi ex omni parte similem fortunam, incruentis potiùs conditionibus, quàm armis decernerent. Neque Zolkeuius astus imprudens fuit, nonnulla tamen quiescendi spe ac necessitate, cum per continuos labores exercitus propè fatisceret; negotium exequendarum tractationum Christophoro Drusbicio mandat: perito Turcarum linguæ, simulque gnaro, quam frustra, & cum periculo proficisceretur.

*Posse ut se-  
cum conditio-  
bus infiga-  
tur peti.*

*Mittitur ad  
ipsum Drus-  
bicius.*

Ho-

*Ingens Tur-  
carum aduer-  
sus Polonos  
imperus 20.  
Novbris.*

## *Historia rerum*

Hostes enim detento eo, diem tantum illum noctemq; morati; dum nouæ copiae quæ ab ipsis iugiter accersebantur, aduenirent: prima vigilia ingenti mole oppugnatum castra Polona subeunt. ibi statim magnam vim sagittarum superfundere, perfringere pertinaciter stationes, inferre se munitionibus; laceßere, circumgredi, occurrere; clamore, sonitu, impetu. Aduersum quos nostri presentibus animis, nil temerè aut trepidè, ad omnes aditus quæ signa ferri, quæ hostes ingruere videbant, centurionibus accurrentibus adhortationibusque, cæde ingenti irruentes excipiebant disijciebantque. Atq; peractum prælium, tum alias, tum maximè eo die fuisset; ni Tartarorum cohortes recentes & ad fugiendum aptiores, quæ equorum velocitate, quæ armorum habitu, statarium grauemq; armis & labore militem, celeri fuga eluissent. Ita fugatis ad breue tempus hostibus, sub occasum solis, quia haud multum diei post pugnam supererat, Zolkeuius suos iterum simulq; hostes mouet.

*Ned, tamen  
in crastino ces-  
sant 3. Octob.*

*Lixarū vir-  
tus.*

Prosequuti enim tota nocte euntes, concursationibus fatigabant magis, quàm conferebant pugnam; donec adulto iam die, tumultum statuis nostris imminentem adepti, validius subiectos inceserent. Sed nostris tantum iam animorum aderat, vt lixæ etiam calonesque cursu in summum clyui

clyui enixi, primo impetu, peneq; vno agmine effusos pellerent. Nec tamen desperabant de victoria hostes; sed equorum virorumq; nouis ac nouis aduentantibus copijs, proxima nocte prosequuti sunt euntes. Et nostri laboribus, inedia, diurnis nocturnisq; vigilijs, fessa ægrè trahendo membra, corpora tamen animis, animos spe sustinentes, ibant non solum per aduersos hostes; sed vias etiam visu & memoria deformes, cum ab impotenti hostium irâ, quacunq; irent villæ, vici, agri, diuina humanaque omnia vrerentur, popularentur; aut si quid frondosi herbiq; relictum ab ipsis fuit, id exorta eo tempore vis locustarum ambederet sædaretque, sanie, odore, contactu.

*Militum calamitas.*

Deficiente deinde nocte, immensam dies plautiæ vimq; hostium euntibus aperuit. Longè ac latè ex aduerso & vndiq; fusis agminibus, aspiciantur pleni hostium campi, terra aquarum egēs, & qui haud procul nomine Reut tenui alueo præterfluebat amnis, infessus ab hostibus; quò potus & aquatio prohiberetur. Locus quoque ipse ex prægressa æstate, incendijs torridus, in os, in oculos, non puluerem modò, tetrumq; halitû, sed etiam cinerem à longinquo, cum quid venti motum esset, & adferebat, & impulsus motu hostium, velut nube obtendendo cælum, solem eripiebat. Adeò vt neminem fuisse crediderim, cui

*Pertinax oppugnatio castrorum 4 Octobris.*

H

oculis

oculis potiùs, quam ratione pensanti, modo suorum inopem paruiamq; manum; modò ingentes hostium acies, effugere captiuitatem aut mortem credibile videretur. Igitur magno illic tumultu concurritur, & fronte, & lateribus, & vndiq; hostes ruunt, coëundoq; simul, in continenti agmine septos, nunc sagittas iaculaq; emittere: nunc inferre se munimentis: quidam arripere currus, dirimere carragines, & aduersùs resistentes cominus niti. Nostri contrà proturbare telis, pellere gladiis, tormentis disijcere. illis diu optata si paululum adhuc tetendissent victoria; aut si emisissent insignitius dedecus & flagitium: nostris, dura seruitus, & extrema salus addunt animos. nec vulnèra iam aut sanguinem morantur, vir virum amplexi, prehensant tela brachiaque; & expirantes cum integris cadunt. Neque tamen peruasèrunt hostes, sed sædius quam accurrerant pulsì, non pugnando tantum perierunt: sed cum in confertos, propèque subeuntes tormentorum hiatu, magna vis plumbearum glandium effunderetur; suomet ipsi certamine, terga impediendum fugam, cædebant prouoluebantque. Nostrorum sex tantum pedites, audentiùs fugientes secuti, circumuenti sagittisq; confixi, cæteros ad obsequium exemplo firmarunt. Exhausta sic die, nox deinde quietum iter dedit.

*novum  
ius & con-  
nia.*

*Tartarorum  
insignis cla-  
des.*

*A Polonis sex  
tantum pedi-  
tes amissi.*

Postero

*in Polonia gestarum.*

59

Postero die propè fluuium Kobiltam nostri confederunt, intenti interim paratiq̄ue, si quid hostes mouerent: verùm ex illo die valida abstinerunt oppugnatione. concursationes tantùm erant, quibus vique ad lucem alteram turbabant fatigabantq̄ue euntes.

*Hostes iam remissius agunt 5 Octol*

Illa die prælium tentatum, sed cum vix quadraginta amplius stadia nostris ad Nestrum superessent, visq̄; octo dierum & necessitates humanæ nihil proficerent, neque nostros aduersus omnia duratos frangerent; desperata victoria Skinder-Bassa cum Galga mæsti manserunt. Kantimiro tantum cum parua parte copiarum à tergo instare iussim, carpendoq̄; postremum agmè domum profequi euntes. Sed vrgentibus iam rem Polonam fatis, cum priorum repente oblitus, ad securitatem negligentiamq̄ue verteretur miles, nimium domestico laborauit, imò labauit malo. Magna sæuaq̄; angustia, cum antea, tum maximè per quatrimum & tres noctes tenebat exercitum. iam solita alimenta deerant, eoq̄; inopiæ ventum, vt miserandis cibis, mandendo equos cæteraq̄ue animalia, quæ sæda in vsum vertit necessitas, propulsaretur fames. Et superato utcumque hoc vno consilijs malo, sitim tamen somnumq̄ue natura vinci non sinebat, cum alij tædio potus & vulnorum inter cadauera sponte procumberent: alij so-

*Skinder-Bassa & Galga desperant de victoria.*

mno fessi cadentesque, nullo ad resurgendum  
 nisu, quasi exanimis linquerentur. Sed super alia  
 alijs diebus tolerata, iam hoc ultimo nouissimoq;  
 vespere, & tormentarius puluis, & aqua rursus  
 deficiebat euntes. nec aliud quo hæc simulq; an-  
 tiqua mitigarentur supererat, quam pauci adhuc  
 tædij via, ac vicinum limen patriæ, vbi post ali-  
 quot horas, pleni gloriæ priuatæ publicæque, cõ-  
 potes commeatum fortunarumq; considerent.  
 Consummare igitur quam ocyus iter, necessitates  
 & Duces Centurionesque suadebant, cogebant.  
 Cum legiones repente incessit feditio, præcipuâ  
 causâ, ob direptas olim in Cetsora res sarcinasq;  
 militum. Nam lixæ remediũ præteritorum, &  
 retinendæ prædæ, solam fugam rati, quamprimũ  
 subtrahere se è castris parabant: moti adhuc in  
 itinere non obscuris sermonibus & minis quorũ-  
 dam, qui exitiabili cõspiratione recuperaturos se  
 sua strepebant. Constabat tamen lixis eousq; ob-  
 sequiũ & virtus, atq; vt à præfectis iubebatur, ita  
 in ordines, stationes, vigilias ibant. Erupit sce-  
 lus, cum milites, nolle progredi, Centurionibus  
 obniti, retinere, impedire alios, cernerent; tunc  
 enim altius coniectantibus timor quoque cum  
 conscientia redibat, quã apud delinquentes in  
 longum memoria manet. Itaq; & ipsi, primo in-  
 ter se congregari, stationes deserere; dein exuere  
 imperium:

*Seditio in  
 castris.*

*Lixarum sce-  
 lus.*



imperium: postremo, cum iam nec fas, nec fidē,  
nec periculum pensi haberent; data tessera, vt nu-  
mero validiores, quod reliquum diripiunt fugi-  
untque: stupentibus rectoribus, quod tumultus  
initium? quis finis? qui accurrentes ad subita, fu-  
gientes increpant, prehensant, retinent, aut si alijs  
flecterentur consilijs, metantur castra. Sed initio  
rapiendi orto, difficilis vltra moderatio; & non-  
nullorum quoq; diffugijs, latius per omnes scelus.  
Itaq; non illi, non Centuriones ius obtinent, ni-  
hil salutare iam non modò ad animum, sed ne ad  
aures quidem admittentibus, quisq; sibi timore,  
exemplo, fit flagitij dux aut comes.

At verò Kantimir cum tumultuari in castris,  
cunctaque rapina & tenebris misceri à transfuga  
comperisset: haud dubius occasionem sibi oppor-  
tunam, prosperè gerendæ rei offerri, accersitis  
Skinder-Bassæ, Galgæ, & Valachorum cohortib;  
discretos animis viribusq; aggreditur. Depelle-  
batur vtcunq; à nostris prima vis; sed alijs irruē-  
tem vim hostium non sustinentibus, passim pars  
cateruatim; pars vitata frequentia, quasi prom-  
ptiores latebris, diffunduntur. Sed neq; fugæ iter  
patuit, cum à tenente circum omnia hoste, vinci-  
rentur, perimerentur, maximè circa ripam Ne-  
stri, vbi manus etiam hostium elapsi, profunda  
hauriebantur aquâ; paucis tantùm scientia vel  
audacia auxiliante.

*Kantimir in-  
multuantes  
aggreditur.*

Zolkeuij expi-  
tus.

Konecpolscy  
& aliorum  
milium for-  
tudo.

Zolkeuius vbi rem perditam videt, immemor  
fui, memor gloriæ, obiectans se hostium telis ca-  
dit. Centurionem leuare eum oblato equo vo-  
luisse constitit, sed ille districto acinace, transuer-  
berare equum volens, leui tantum per ætatem  
ictu, vulneratum repulit. postea vbi densissimæ  
hostium manus contendens, neq; ætate, neq; cor-  
pore par; præcisa etiam, vixque cuti adhærente  
dextera, ignorantia nocturna opprimitur. Sensit  
Konecpolcius collegæ casum, atque vt fortissi-  
mum quenq; suorum noscere poterat: Nostrum  
iam, inquiebat, opus est milites. agitedum, dila-  
psis alijs, amisso imperatore, vos præcipui me se-  
quimini. hic aut propè te Zolkeui cadendo: aut  
victores redeundo, maturam, te, nosque de-  
ferentibus, vltionem aut poenitentiam accelera-  
bimus. Mutatis per hæc animis; tum quia præ-  
fecti & centuriones similia quoque militibus suis  
ingerebant, plurimi restiterunt. sed pertinatio-  
r quam feliciores ipsius virtus fuit. quamuis enim ali-  
quot defuncti prælijs, confertos transiissent ho-  
stes; in novos tamen incidendo, clausi aduersum  
circumfusos, & fæsi cum recentibus iterabant  
pugnam. Tandem apertâ sibi ferro quisque in su-  
am partem viâ, cum distracti, singuliq; aduersus  
plurimos imparem dimicationem iniissent: labo-  
re & vulneribus confecti, in manus hostium ve-  
nerunt.

nerunt. Morabatur adhuc Konecpolscius & Dinophius victoriam, iamq; interfecto Dinophio, multis nequicquam hostes circa Konecpolicium conatibus captis, cum notesceret ducem esse, velut ad prædam conuersi, neglectum in acie deserunt. dant interim cuidam negotium, vt gnarus linguæ, simulata fide ductorem ei se itineris offerendo, viui quoquo modo potiretur. exequitur ille vt iustum erat, deductumq; in angustias tradidit hostibus. Postero die vbi primum illuxit ad legenda spolia, stragemq; suorum & nostrorū visendam hostes insistunt. vbi Zolkeuius inter promiscuas cadauerum strues repertus, & canitie præque cæteris augustiori facie agnitus, præbuit victori iugulum. Nullum caput adeo fixis attentisque oculis lustrasse Skinder-Bassiam proditur; siue explenda lætitia, antequam illud Byzantium mitteret: seu splendor maiestatis etiam in mortuo, quamuis immitem animum imagine tristi confuderat: vel etiam viri inimici, fortunæve recordatio, & sibi conscia supremi mens, ferum animum aspectumq; retinebat. breui enim & ipse quasi supremo edito opere occubuit. Hæc fuit insignis atque inter paucas memorata Polonorum fortitudo & clades.

Sed me quominus progrediar, indulgentiâ Ducum, lixarum impunita olim in Cetsora licentia,

*In Cetsora periculosiore  
fuisse seueritas an clemens*

an

an pereundi perdendiq; omnia, inuicto tot prælijs exercitui causam adduxerit, paulisper retinet. Grande enim in bellis momentum disciplina, rigorque & seueritas vnum armatæ multitudinis munimentum. alibi locus est clementiæ, imperator in castris timebit nisi timeatur. Neq; ista abnuo, scire tamen quod ex vsu, quàm quod in vsum promptius; quoniam & consilio non ita diiudicari potest, quid optimum factu sit; quàm euentu pessime factum esse, si factum est. Atqui seueritate admisissent tunc Duces, quàm vindicassent scelus. Quid enim futurum fuit, si illa calonum lixarumq; plebs, cui nec boni intellectus, nec mali cura, multa & valida; ne in supremo articulo extrema timens, sublata spe veniæ pertinaciùs accenderetur? Reformidat animus euentû ominari, si in confusione illa & lymphatico pauore, conspiratio aliqua vindices petiisset. Næ tunc fracta seueritas & sine viribus maiestas iacuisset, cuius remedium erat nescire scelus, quo si intelligeretur pereundum omnibus fuisset. Prohibuit id ingenium Ducum, eoq; modestia ac tempestiua indulgentia effrænem multitudinem perduxit, vt insignem etiam frugem virtutis fortitudinisq; impunitate ediderit. Verumenimvero dum exercitum ex legem ac velut bicipitem considero, discordia nostra est, irreuerentiaque Ducum

*Discordia.*

*in Polonia gestarum*

Ducum, quæ rem Polonam afflixit. Sic stare, sic instrui acies iubetur; certæ victoriæ prauitas damno fuit. ire carragine decretum est. pergere duces vltra iubent, tu reluctaris. Adeo nullibi obsequio pares, & bello maius impedimentum quàm auxilium sumus. At dum paruimus, nunquam dolis, nunquam aperta acie, nunquam æquis, nunquam iniquis locis laborauimus. Tormenta, sagittas, saltus impeditos, malè concors miles timere potest; mille acies grauiiores, quàm Turcarum Tartarorumq; auertit auertetq;e, modò sit illi, constans eius quâ omnia crescunt, concordia, auctoritatisq;e imperatorum, quia à Deo, cura.

Interea per Poloniam, nondum cognito, qui fuisset rerum exitus in Valachia, multus vbiq; sermo, catus passim per vrbes, per templa, per fora, per compita visabantur, vario super exercitu rumore differentium. Alij obsessum quidem, nondum tamen extremis premi, aut comineatu destitui, vulgabant, credebantq;e: alij velut præsa-gientibus animis, silentio rerum vt sit grauiora metuebant: alij iam aliquid ab alijs accipiebant. sed ad tempus ista conficta, dum Comitia instarent, quo liberior indictio statueretur, exigere-tur, omnia vt falsa aspernabantur. Tum verò vbi intulit sese in Rufsiam hostium exercitus, & vi-

*Rumor per  
Poloniam.*

*Tartari ir-  
rumpunt in  
Rufsiam.*

*Stanislaus Lubomirscius.*

*Tartari Leopolim transerunt.*

*Terror ubiq.*

*Laurentius Gebicius.  
Martinus Syscouius.*

spe furens ac præcep̄s: atroces iam nuntij passim-  
que per omnia terror, re subitâ, & quod ad ar-  
cendum nihil prouisum aut paratum. Stanislaus  
tantum Lubomirscius Comes in Wisnic, Capita-  
neus Sendomiriensis, paucis ante diebus, suppe-  
tias exercitui ferens, strenuè aliquot circa Leo-  
polim locis, in populates prædamq; agentes im-  
petum dedit: sed nec multitudini, nec in immen-  
sum diffuso agmini par, recuperata insigni præ-  
da, præsidio Leopolim concessit; indeq; solutio-  
re curâ suggredientes aliquot eruptionibus retu-  
dit fuditque. Sed hostes abstinentes acie, Leopo-  
lim transgressi Grodecum vsque, omnia armis,  
cædibus, incendijs, direptione proterentes, ter-  
rorem latius porrexerunt. Fit vndiq; fuga agre-  
stium, omnis sexus, omnis ætas; illustres, ignobi-  
les in vrbes congregari iamq; alij pauentium glo-  
bis immixti, animum vultumq; conuersi, quisque  
sibi quisq; alteri consulere: alij nequedum com-  
perto, quosnam illa vis abstulisset; hic fratrem,  
propinquum ille, alius parentes lamentari. Cum-  
que malis sicut ingentibus, ita subitis tumultus  
& fletus obsistere peret, Pontifices quoq; inopes au-  
xilij humani, populum ad Deum & vota vertunt.  
Et Laurentius Gebicius Archiepiscopus Gnesnensis,  
ac Martinus Syscouius Episcopus Cracouiensis,  
repetitis supplicationibus, ad exemplar triennis  
olim

*in Polonia gestarum.*

67

olim religionis, præeunte verbis clero, cum coniugibus liberisque paruis, veniam irarum celestium, finemque cladi, Deum, Diuos etiam Indigetes Tutelares exposcere iubent. Audita preces, & abscessere terra barbari, tanquam bellum potentioribus copijs differrent.

Tum verò haud multò post, palam facti viui mortuique, quos & bellum & præsens rapina abstulerat, iterum priuatas per domos complorabantur. Sed non alia quam Herburtea, Zolkeuij vxor, non visentium modo, sed etiam reputantium, animos & oculos miseratione afficiebat. Huic nihil non luctuosum, interfecto marito, simulque incerta spe erepto vnico filio, quo cum nec luctum, nec oculos solari valeret; infelix matrimonium pertulisse, vitamque atroci dolore, iam è vita exempta trahere credebatur. Atque vbi allatum cadauer, quod per vulnus illi ad Bycinum inflictum cognouerat, cruentum truncum amplexa, cuius sortem concessio periculis filio onerasse videbatur, seruabat sanguinem vestesque resperfas; inops vidua, anxia spei, implexa luctu bino. Portatum deinde militum humeris cadauer, monumento vrbeque quam viuus cognomento suo condidit sepultum est. Is finis erat viri; ætas septuagesimum annum excessit. honores priuatos publicosque miles primum sub Ioanne Zamoscio,

*Herburtea & vxor Zolkeuij.*

*Zolkeuij elegium.*

deinde Magister equitum meruerat; defuncto eo, Generalis exercituum Dux factus, moderatè quoad imperium tantum; postquam Cancellariatum, nimium vsq; ad finem vitæ multorum inimicitijs conflictatus est. propensiore tamen Regis quàm ciuium fauore fuit. Moschouiticis expeditionibus clarus, vbi hostilibus armis, captorumq; Principum catenis, Basilij Suisij Imperatoris Moschouia, Ioannisq; & Demetrii fratrum suorum, grauem Regi Sigismundo triumphum dedit. Innocentiam iustitiamq; eius non argueres. nec minor ex eo gloria, quod incursionibus Kosacorū, sæpius turbatam pacem, mirè cum Turca temperauit.

*Comitia.  
Senatores  
creantur.  
Matthias Lubin-  
scius.*

*Georgius Dux  
in Zbaras.  
Ioannes Comes  
in Tecyn.*

Dies deinde Comitiorum Varsauiæ iij nonas Nouembris indictorum aduenit. Creati Senatores. in Episcopum Chelmensem Matthias Lubin- scius notæ pietatis industriæq; vir, sæcunda etiam fratrum suorum claritudine, surrogatus est. collegio secularium delecti, Georgius Dux in Zbaras, & Ioannes Comes in Tecyn; celeberrimi prudentia, rerumq; ciuiliū peritia. qui quamuis per auitas opes gloriamque non concupiscerent, inclytæ tamen vtrorumque familiæ honos auctus est, oblato principe in Senatu ordine, vni Castellaneatu; alteri Palatinatu Cracouiensi: quò vtrorumque virtutes, loco, officio, societate cōnexæ, in su-



*in Polonia gestarum.*

in supremo fastigio campum exemplumq; haberent. Posthæc de bello Turcico senatusconsultata fiunt, & absumpto recenti clade Duce, quinam surrogaretur quærebant. Omnium ore Ioannes Carolus Chotkeuicius Palatinus Vilnensis, idemque Generalis exercituum per Lithuaniam Dux celebratur, cultu habituq; moris antiqui, prospera ubiq; fortuna, & quod necessarium tunc videbatur, disciplinæ militaris custos. Huic Stanislaus Lubomirscius Comes in Viniæ collega adscitus, aliquot expeditionibus experti in patriam amoris, miro quoq; ciuium fauore, modicâ seueritate, & exercitui comitate non ingrata. Designati insuper, quorum consilij conditiones pacis & arbitria belli tractarentur. Exercitus sexaginta milium sufficere visus properatusque. Præter stipendiarios, delectus etiam nobilium concessi, quoque paratior foret nobilitas, vt lustratio singulis annis, suis Palatinis fieret, plenius quam antea & vberius cautum. Facta ibidem militi spes honoratioris militiæ, neue vlli dum in castris ageret lis noxæ esset, aut stipendium capto vel mortuo patriæ causa intercideret, sed ipsum, liberos, vel propinquos moraretur, decretum. Verùm nihil æquè fatigabat, quam pecuniarum conquisitio, inopi pene regno, cunctaq; scrutantibus optimū visum inde occurrere, quod inopiæ causa erat.

*Duces belli designantur.*

*Ioan: Carolus Chotkenicius.*

*Stanisl: Lubomirscius Comes in Viniæ.*

*Recuperatores vulgo deputati.*

*Lustratio.*

*Rogatio ad-  
uersum luxus*

Ita & aduersus ambitionem militarem, & dome-  
sticum luxum rogatio promulgata. Illa scitum,  
ne auro argenteve cælatus compareret in castris  
miles: altera, statutis ante rerum pretijs, ne pro-  
miscuus fieret sericorum vsus, cautum, quæis in  
immensum tædijs exquisitoribus, vulgi etiam  
portatu, pecunia profundebatur. Sed vetabitur  
istud & retinebitur, palamque tantum fiet quibus  
vitijs impares sumus. olim autem nobilitatem  
virtute & hâc vna notâ à plebe discriminatam fe-  
runt, nunc etiam humilem faciem illustis fucus  
velat, quodq; præcipuum esse debuerat virtutis  
familiarumq; discrimen, ne foediora recenseam  
passim miscetur & confunditur. Actum præte-  
rea, vt legati petitem externa auxilia mitteretur.  
Romam Achacius Grochouius Secretarius regis:  
ad Imperatorem Maximilianus Przeremscius Ca-  
stellanus Siradiensis: in Angliam Georgius Ofo-  
linscius Palatinides Sendomiriensis: ad Status  
Holandiæ, Petrus Zeronscius Secretarius regis  
missi. egregij omnes, & qui præter alias virtutes  
artesque, facundiam quoque ferrent. Hæc sunt  
præcipua arbitrio Senatus decreta.

Allata deinde Zolkeuij honorum insignia, cla-  
ua annulusq; Regni. vtraq; per Thomam Zamo-  
scium Palatinum Kiouia, in frequenti populi,  
Quiritum, Senatorumq; corona Regi reddeban-

tur:

*Thomas Za-  
moscius.*

*Legati ad ex-  
teros Princi-  
pes.*

*Grochouius.  
Przeremscius  
Ofolinscius.  
Zeronscius.*

tur: oratione egregiè culta, quâ laudatis Brutorum, Deciorum, Marcellorum penes suos milites mortibus; parem Paulo Æmilio Romano ad Cannas, Imperatoris nostri exitum facundè memoravit. erectis ad tam magnificam orationem prorsus omnibus; quam adhuc altius patris in illo imago, Senatorius viri decor, vultus, habitus, gestus dicentis, attendentium animis adfigebat. Sed hæc eius verbis per Poloniam excepta vulgataque edere supersedeo. Clava Chotkeuicius; annulo publico supremoque Cancellariatu Andreas Lipscius Episcopus Luceoriensis honoratus, vir iudicio, calamo, & ore magnus, pro veritate firmissimus, cuius amplitudinem frustra stringerem hoc angusto spatio vel manu.

*And. Lipscius*

Eodem tempore, Praga Bohemorum à Ferdinando Cæsare Regeque recuperatur; ausa in eum rebellionem, dum virtutes Principis veretur; nec alijs satis quietam, quamvis scelera segniter ferentibus. Nam & in Rudolphum cæpta erat seditio. petulantia tantum gentis, cum luxu, libidine, facinoribus, in numerosas superstitiones procax, vixque illis ulterius retinendis par; vi ac obsidione ad firmanda diplomate iniqua, legesque sibi libitas eum adegerat: velut amore quietis à Catholicis, curaque publicæ pacis; ipsis inter tot religionum vocabula discordantibus; nisi quod inter malos evenit,

*Praga à Ferdinando recuperatur.*

*Causa rebel-  
lionis eius.*

*Exitum.*

*Frider. Pala-  
tinus Rheni.*

*Legatio Bo-  
hemorum, Si-  
lesiorum, Mo-  
rauorum.*

euenit, vt aduersus alium, concordēs similitudi-  
ne coeant. Neque id Matthiae Imperatori pro-  
batum; sed iniquissimam rem questus, vltra non  
anquirebat, ipsis tamen agentibus ferentibus cun-  
ctis libidine ac permissu: donec contra fas iusque  
exstructis duobus templis, vno in Archiepiscopi,  
altero in Abbatis Pragensis fundo, vbi æquitate  
apud recuperatores vincebantur, perduellionem  
aduersus Ferdinandum induerunt. Exinde ar-  
ma rapiunt, fasces Regni inuadunt: initio à pro-  
iectis in præceps per fenestras iudicibus factis;  
prono quoque in icelus populo, quasi prætextu re-  
ligionis; sed nisi pollutum obstrictumque meritis  
suis Regem haud passuro. Momentoque tempo-  
ris flagrabat ingens belli lues: circum prouincijs  
descendentibus, Vngaria quoque contacta: æquè  
gravi hucusque flagitio. Dein' hoc ipsum quod nul-  
lus regentes reget, Fridericum Palatinum Rhe-  
ni vltro sumere regium insigne impellunt; non  
tam quod ipsum mallent, quam quod non habe-  
rent alium: facili iuvene, dominationis cupidi-  
ne, & futurorum incurioso. Sed pulso eo hoc  
mense, non aliud subsidium fuit, quam pernici-  
tas equorum, quæ se & coniugem abstulit, quæ  
que antea Regem, tam postea propè exulē gessit.

Peracto bello, incertum an nescij, ad Comitia  
tres legati, Bohemorum, Silesiorum, Morauorum

(nam

(nam & ijdesciuerant) Varſauiam veniunt. in Senatum introducti, Statuum ſuorum nomine variam orationem habuerunt, partim ſe purgando de interceptis olim apertiſq; Regijs ad Cæſarem literis, tum ne ſuo conſilio excitari contrà Polonos Turcam; aut propoſito excindi Catholicam religionem credatur: partim poſtulando ne ſe veteres ſocios à Liſſouiensibus, olim ad Cæſarem tranſgreſſis, fædius ſpoliari vexariq; quàm hoſtes patiantur; & cum auxilia aduerſus Imperatorem non implorent, aduerſus ſe etiam miles contrahi non permittatur. Finita legatione, dimiſſi benignè, fæderaq; & pacta quæ cum maioribus ipſorum intercederent, ſeruare velle Polonos reſponſum.

Sequitur immane portentum, quid exhorreſcis calame? tunc primum in Polonia auditum viſumq; nefas, hoc ſolum ab ipſa excuſatum, quòd nemo alius illi ſceleſto nomen aut conſcientiam commodauit, què ne per flagitium quaſuiſſe famã putetur, æterni potiùs ſilentij pœna, cū illo incendiario templi Dianæ, quàm nomine aliquo affecero. Intrabat ex more templum Rex, Deo primum ſanctimonixq; attentus, antequam animum ad curas Regni verteret; & ecce nefarius foribus abditus, aſperatum faxo ardentemq; malleum roſtrato mucrone in caput præ-

*O ſcelus, o portē  
centum.*

*Lucas Opalin-  
scius.*

*Famulitium  
Martini Sisco-  
uicij.*

*Ioannes Kalin-  
scius,  
Bonaventura  
Rogascius.  
Ioannes Zebrzy-  
douius.*

tereuntis attollit; opportuno tunc flagitio, cum Vladislaum Principem, Primoresque sequentium occupatos, ipse etiam porta paulum ad limen adducta moraretur. Sed o praesides Angeli, vosque sacrata altaria, ictum fallente manu, leui tantum genae vulnere bis in humerum manubrio illisit; tertium iam ad verticem directum, obuersus Lucas Opalinscius, Marschalcus Curiae virga retinuit infregitque. Concidit Rex graui casu per laeue & lubricum pauimentum ante tabernaculum sanctissimi Sacramenti a se verè regio sumptu recens extructum; omnibus parricidam persequentibus, ac maximè Vladislao filio, quem a caede percussoris, pietate & dolore violentum, quanquam inflicto iam percussori vulnere, aegre alij tenebant; non miseratione aliqua, sed quò suspecti latius sceleris indicio reus seruaretur. Interea Martini Siscouicij Episcopi Cracouiensis famulitium (quod illius splendidum semper illustrium virorum aulae adest) prouolutum iacentemque Regem aspiciens velox accurrit. Atque haerentibus cunctis, cum auxilium periculi cuiusque; aut suspicionis tardaret metus, primus Ioannes Kalinscius, adiuuante per manus Bonaventura Rogascio, acceptum medium terra adleuat: accurrit & Ioannes Zebrzydouijs Ensisfer Regni, simulque voce, manu, stricto gladio exprobrat scelus.

Ius. Opertum deinde gladijs manibusq; familiares Episcopi ad ipsum, qui tunc peracto sacrificio infcius omnium in occursum Regis facello prodibat, deducunt. Is Regem sanguine oblitum cernens, attonitus silentio mox fletu exceptum compellans: Non hoc, inquit, optime Princeps infelicibus votis inuocavi, vt superstes, labem insuper hanc in patria cernerem? Hæcine tibi pro omnium cura summaque bonitate redditur gratia? hæcine sunt tua pro salute Reipublicæ tot exantlantibus laboribus præmia? sicine tibi pro summis in Rempublicam meritis & beneficijs reppenditur gratitudo? Noster is dolor, nos isto sanguine perfusi, cum vulnere tuo nostrum omnium capita Reique publicæ salus peteretur. Simul amplexus ægrum premebat vulnus, adstabatque attonitus, miserabili inter sanguinem & lachrymas prospectu. quippe cuius periculum morte sua redimere pijsimus Pastor optaret: hunc ipse in templo temeratum, tanquam victimam ad aras fauciam foueret, voce, complexu; verè animo Senator, pietate Sacerdos, amore Ciuis. Neque deinde abscessit à latere; sed post cum nonnullis aduenientibus Senatoribus in palatium comitatus: felicitatem etiam diei primus in Ecclesia, in qua Rex vulneratus, supplicationum honorauit celebritate. At verò nondum planè vul-

*Terror per  
Varsavian.*

gato Regis periculo, pauentia fora templaque,  
& per urbem tumultus. nam neque scire quid  
contigisset, nec percuntantibus ignari reddere  
responsum poterant: & clamor vbique, diuersa  
rogantium, incerta respondentium: & concursa-  
tio incidentium aliorum in alios, quasi hostis vr-  
bem teneret, populum affecerat, (de Tartaris e-  
nim tunc eorumque irruptione rumores sparge-  
bantur) quousque attentatum Regem parrici-  
dio, sed ire in melius valetudinem, rumore, mox  
aspectu, (nam vt sedaret motum videndum se  
præbuerat) incolumem etiam esse pernotuit.  
Dona ob hæc templis decreta gratesque Deo.  
Præmium subleuanti à Regina torques aureus,  
trigintaque millia sestertiūm, à Senatu bona per-  
cussoris data. Nam Rex clementissimus casum  
æquo animo ferebat, nec quicquam acerbum vel  
indignum locutus; quinimo pro percussore de-  
precādo, pro sua parte veniā illi ac velut innocen-  
tiā donabat: obstinarunt tamen omnes, & quam-  
uis nefariū palam mente captum constaret, hoc  
tamen illi veniam omnem ac misericordiam exe-  
merat. Et cum nec tormentis, nec ignibus, nec  
vllis pænarum experimentis quispiam conscius  
inueniretur; ille nihilominus iudicio publico da-  
mnatus, omnibus spectaculo destinatur. Itaque  
arreptum lictores, candentibus hinc inde forci-  
pibus

*Supplicium  
parricide.*



pibus lacerantes extra urbem deducunt. ibi eminenti ad id factō theatro aptatam malleo rostrato dexteram flammis adurunt, nudisque iam fluentem ossibus cum laua amputant: postea admotis quadrigis distentum illigant, equisque in diuersum concitatis, lacerum corpus, laniatasque partes cremati, ac cineres disijciunt.

Fine anni vulgantur prodigia. Terræ motus non aliās latior, Leopoli, Cameneci, Luceoriæ, Halicij, & per alia ignobiliora oppida. horridior adhuc crebriorque per Valachiam; vbi etiam tellus decussatim dimota fuit, indeque scaturigines fluxisse memorabantur. Item ex villa Sytkoyce ad aliam sponte transiens cliuus.

*Prodigia*

Iisdem diebus excursione cohortis, quam Duces in Zbaras hostibus prædas abigentibus obiecerant, Turcarum legatum ad magnum Chamum euntem interceptum accepimus. Sed ego cum fine anni hic quoque rem


meam feco &

FINIO.


Errata sic corrige.

- Pagina 8. versu 4. Machiam pro Matthiam.  
12. v. 19. assuescendi pro assuescendi.  
18. v. 19. premij; pro præmij;  
20. v. 11. perpulerunt pro perpulerunt.  
19. v. 16. fuga pro fugam  
34. v. 7. variaq; pro vanaq;  
35. v. 7. quod pro quò,  
38. v. 5. ui pro ni  
55. v. 18. accersurum pro accessurum  
57. v. 1. clyui pro cliui  
57. v. 12. herbiq; pro herbidiq;





7529  
—  
2





15.437

7523  
—  
2

